

O LE SULU SAMOA



EKALĒSĪA FAAPOTOPOTOGA KERISĪANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

SETEMA 2013

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

Mo le Au Taumafai

Lauga o le Lotu Au Taumafai i
Brisbane, Ausetalia - 5 Me
2013:

Saunia e
Fiu Tuipala Vaigafa Malu

*"O le faaola tagata, e le
mana'omia ai le falana'i ma le
talaleu, ae tu ma savali, e ofo
le ola mo isi. E le'i tuvale pe
faasega tulauniu, le lupe i le
galuega o le leleiga, na saunia
e Keriso, aua na ona usiusi lava
faasii o savili, le maitau a le
faaauau itulau e 5*

O le 'Ofu

E faapefea ona e
faamagaloina se tagata o e ita
ma e le malie iai ona ua ia faia
se mea leaga ia te oe?

O se tala mo ulugalii talavou

E talavou Maria. Tumu i
moomooga o teine talavou. Moe
miti i mea e tele e mana'o iai i le
faaauau itulau e 7

O le Pese na fatuina e Sagato Faranisisi o Asisi

O fuaiupu faavae: Salamo 145
10,11: "Le Alii e, e vivii atu ia te
oe mea uma na e faia; e faafetai atu
foi ia te oe ou tagata amio Atua.
faaauau itulau e 10

Tala o le Malumalu Iupeli

Saunia e Rev. Dr. Iutisone Salevao, Failautusi Aoa o le Ekalesia



**Ua 116/117 tausaga o
le Maota Iupeli leni. O
se taimi e matua umi
lava. Tatou manatua ma
le faafetai le tala**

Ata i luga: Malumalu Iupeli i Malua 2013

**faasolopito oloo ta'oto i
le Malumalu leni, o le
faaauau itulau e sosoo ai**

Faatofa atu i le Malumalu Iupeli

**Ua fia ni loimata maligi
i le anofale o le Iupeli?
Ua to'afia ni a'oa'o, ni**

**faifeau, ni faletua, sa
a'oa'o ai; sa tapua'i ai; sa
faaauau itulau e 3**

Fetalai le Atua, na te le manatua!

E iai taimi e te naunau ai lava
ina ia faamagaloina oe e se isi
faaauau itulau e 15

**Na amata faigaluega
lesu i le pisinisi a lona
aiga**

O le a le matua o Iesu ae ia
silafia o ia o le Alo o le Atua?
silasila itulau e 13

Tala o le Malumalu lupeli

mai le itulau muamua

soifua faale-agaga o le Ekalesia na foafoa ma faafailele ai, o le sa'iliga tofa a le Fono Tele mo se manuia o le Ekalesia, tainane le tele o soifua na fafau atu iinei mo le galuega o le Malo o le Atua i le lalolagi.

Ou te 'oto'oto se tala mo le faamoemoe o lenei aso.

(1) Sa'iliga o se fanua mo le a'oga e Misi

Ua mana'omia se fanua e faatu ai le a'oga faa-faifeau a le Ekalesia ua tupu ma toatele, ae le'i mautu se fanua e fai ai. Ona fono lea o Misi Ale, Misi Tana, ma isi i Fasitoo-tai i le aso 21 o Mati 1844 e amata saili se fanua.

(2) Savalia Fasitoo-tai i Faleula

O le i'uga, o le a savavali Misi mai Fasitoo-tai se'ia oo atu i Faleula, ma vaavaai poo fea se fanua talafeagai. Ua fo'i mai Faleula, ma fai le i'uga, o le a faatu i Maluapapa nei le a'oga faa-faifeau a le Ekalesia.

(3) Faatuina le Kolisi o Malua i le 1844

Ua lausilafia le faatuina o le Kolisi o Malua i le 1844, amata i le masina o Setema. O le a'oga na faatu, e fofoa ai mafaufau, o loto, ma amio faa-Keriso mo le galuega o le faa-Kerisianoina o le lalolagi.

(4) Mana'omia se malumalu tapua'i mo le Kolisi ma le Fono Tele na amata i le 1875

Ua tupu le Kolisi, faapea le Ekalesia, ua faatoateleina pea, faapea lana Fono Tele na amataina i le 1875, se'ia oo ina avefa Malua nei ma malaefono, o le laumua o le Ekalesia i le 1893. Ua aliali manino mai, ua mana'omia se Malumalu mautu mo le Atua i Malua.

(5) Fausia le Fale lupeli

Masalo sa faamoemoe e fai le lupeli lenei i le 1894, ina ua atoa le 50 tausaga o le Kolisi. Peitai,

faatoa amata fai le galuega i le 1896.

(6) Umusa le lupeli i le 1897

Mae'a le galuega, ona faaulufaleina lea o le Maota lupeli lenei i le 1897. O tupe sa sasao i Matagaluega, o meaalofo tupe na maua mai uo a le Ekalesia i lea vai taimi, faapea nai tupe na sasao e a'oa'o ma faletua o le Kolisi - o tupe ia na totogi ai le galuega o le Maota lupeli lenei. E leai se aitalafu.

(7) Isi mea e uiga i le lupeli

Faafetai i le Atua, ona o le saili malo o matua o le Ekalesia ua fai i lagi le folauga, tainane nai Misionare na faama'ite mea lelei. Faafetai i le Atua ona o i latou na tapenaina le ata ma vae ma lima iai le fausiaina o lenei Malumalu matagofie. E le o le faamoemoe ina ia sii mai Peretania ma faatu i Samoa nei, ae ia fai se Maota lupeli e fai ai le viiga i le Atua, ma malu ai le Ekalesia i lona anofale.

(8) Faafouga o le lupeli

Pei ona lausilafia, talu mai le 1897, e le'i alo tamala le Ekalesia i le faaleleia pea o le Maota lenei, i taimi e mana'omia ai. O faafetai e tataua a ona fai. E ao ina faafetaia le Kolisi o Malua mo le teuteuina faamatagofie o le lupeli i nei tausaga e tele. Faafetai foi i matua penisione ma le Komiti a Tama o le Ekalesia mo le atamai matua sa mamalu ai le ifoga a le Ekalesia i lona Atua i totonu o lenei Maota.

(9) O le lupeli fou

Faata'i se tala, o upu i le gataifale, aua le faafinai ma le lualuta o le tai loloto. Seu i fanua le faatamasoaliiga, se'i toe mata'itu le taaviliga o le tau. O le tofa sagatonu lea o le tai ma le taimi, ua faavae ai le finagalo o le Fono Tele, ua afu le tautua a le Maota lupeli tuai

lenei. E le gata ina ua le toe atoa lona saogalemu, a ua le toe ofi ai le pa'ia o le Ekalesia mo ana tapua'iga fai tele i ona aso faapitoa. E ui lava la i lona taua i itu eseese, a ua tataua ona faia se Maota lupeli fou.

(10) Fuafuaga o le galuega

Fuafuaga o le galuega. O le masina fou e amata ai ona talatala lemu le Maota nei. O le pulelaa ma isi totoga, ua faamoemoe e tuuina atu i le Fale Mata'aga e fai ma faamanatu. O nisi o pou o le a fausia ai le Maa Faamanatu e tusa ma le ata ua tapena mai e tusiata o le Fale Mataaga. O faamalama e fia faaogaina uma i le lupeli fou, e fai ma faamanatu. O nofoa, atonu o le a aoga pea i le Maota lupeli fou, e fai ma faamanatu. O apa ma le faalo, lea ua ta'oto le talosaga a le Kolisi o Malua, e fia fau ai se fale faamanatu a le Kolisi. O isi vaega o totoe, faasino mai e le Agaga ni mea e aoga iai. O le amataga o le masina o Novema, e fai ai le tauofoga o le galuega. Maua se kamuta i le vaiaso lona lua o Tesema, amata ona fausia le Maota lupeli fou i le amataga o le tausaga fou, 2014.

Faafetai, faafetai tele le Ekalesia, saga viia pea le Atua i au taulaga mamala ma lou afu pa'ia, lea o le a faatupe ai le galuega o le Maota lupeli fou.

(11) O le lupeli o le Maota mo Tapua'iga a le Ekalesia

O upu ta'utino o le tala faasolopito. Afai na ogatotonu le Maota lupeli tuai, ma o le a toe ogatotonu foi le Maota lupeli fou i le aai pa'ia ma le eleele sa lenei, ua tataua. E ao ina ogatotonu le tapuaiga i le Atua i le soifua auuina o le Ekalesia Faapotopotoga Kerisiano Samoa. Ona o le tapua'iga o le toto pa'ia e fetafea'i ai le ola pa'ia o le Ekalesia, ua tataua ona ogatotonu le tapuaiga i le Maota tapua'i lenei. O le Maota lupeli fou, e ifo ma tulivae ai le Ekalesia i lona Atua.

Ia faamanuia mai le Atua.

O LE LAUGA

Lauga o le sauniga mulimuli i le Malumalu lupeli i Malua a o le'i talaina i lalo - 29 Aokuso 2013

Saunia e le Taitaifono o le Ekalesia, Susuga i le Toeaina Faatonu, Tavita Roma FT.

* * * * *

Tusi Faitau: 1 Tupu 8: 17-21; Mataio 26: 6-13

Matua: 1 Tupu 8: 17-18 - "Sa loto foi lo'u tama o Tavita e fai se fale mo le suafa o le Alii. Na fetalai mai le Alii i lo'u tama o Tavita, Aua ua e finagalo e fai se fale i lo'u igoa, ua lelei ina ua i ai i lou loto."

AUTU: "E le leaga i le Atua lo tatou faamoemoe e fausia se malumalu e sili atu ona lelei e ta'u ai lona suafa."

Faatomuaga: Ua maopoopo ona faatasia e Tavita ituaiga e sefulu ma le lua o le nuu o Isaraelu i se faigamalo soofaatasi. Ua faatuina foi le aai o Ierusalem e fai ma laumua o lona malo fou. Ua mae'a foi ona fausia ai ma lona maota e afio faa-tupu ai, ae ua faalavelave pea i lona finagalo se fale e tuu ai le Atolaau o le Feagaiga, le faailoga vaaia o le fesootai mai o le Atua i lona nuu, aemaise i taimi o ana tapuaiga ma ana osiga taulaga. Lea na ia faapea atu ai ia Natano le perofeta, "Ou

te fia fai se fale e tuu ai le suafa o le Atua, aua faauta, ou te nofo a'u i le fale arasi, a o le atolaau a le Atua ua iai ia i totonu o ie puipui."

Ua fia fai e Tavita se fale fou mo leova ina ua le o lelei le mea oloo tuu ai nei le atolaau. O le naunau lea o Tavita e fai se fale mo le Alii, lea e ala ai upu o la tatou Matua: Na fetalai atu ai le Alii ia te ia - **Aua ua e finagalo e fai se fale i lo'u igoa, ua lelei ina ua iai lou loto.**

Le Ekalesia, nei fesiligia i se finagalo lo tatou faamoemoe i le aso, ou te matua talitonu ma le loto maulalo, e pei ona fetalai le Alii ia Tavita: **Ua lelei ina ua iai i lou loto,** tatou te mafanafana
faaauau itulau e 4

Faatofa atu i le Malumalu lupeli

faau'u ai; sa faa'ula ai; sa fetagisi fiafia ai ma tapu'e o latou ata. Fetagisi i le tauamataga o le tuua o aiga, ma nuu, ma eleele, ae o atu e aumau i nuu ese i le olaga atoa, ona o le Tala Lelei ia Iesu Keriso le Faaola.

Mai aso o le Vaalotu o le loane Viliamu e le silafia e nei augatupulaga, sa malaga ai, ma mama'i vasa ai a o malaga atu i le fia afe maila e o i Papua ma Niu Kini ma isi motu o le Pasefika, e tala'i le Tala Lelei ia Keriso, i aso e leai ni vaalele, seia oo mai i lenei tausaga 2013, ua 116 iai tausaga o tu mai pea e fai ma faamanatu ia te oe le taimi na faapa'aina ai oe mo le fe'au o le Tala Lelei ia Keriso. Ae le mafai foi ona faagaloina e faifeau sa lauga ai i le lupeli. A o le loaloa foi o le Ekalesia sa auai i le tele o sauniga sa fai ai. E mafai lava ona tatou mitamita ma faapea ane - "Ou te manatua le aso na faau'u ai a'u i le lupeli." "Ou te manatua le aso na ou lauga ai i le lupeli." "Ou te manatua le Aso Sa na ou Faamanatuga ai i le lupeli!" "Ou te manatua le aso na fai ai la ma

faaipoipoga i le lupeli." "Ou te manatua la matou Aso Sa o Tamaiti i le lupeli!" E manatua foi e le toatele o matua lo latou fiafia i le taimi na faaiuina ai ma faauuina i le lupeli a latou fanau, atalii ma afafine, ua i'u, pe ua aveva ma faifeau

A ua fia foi ni Fono Tele a le Ekalesia ua usuia ai a o le'i faia le Maota Fono fou ua iai nei i Malua?

A o lea o le a tuu i lalo!

O se tasi lea o sauniga na matua tumu ai le lupeli. Sa auai le Afioga i le Ao Mamalu o le Malo, le Afioga ia Tui Atua Tupua Tamasese Ta'isi, ma le Masiofo ia Filifilia, faapea le Afioga i le Sui o le Fono a Sui Tofia Afioga ia Tuimalealiiifano Vaaletoa Sualauvi II.

Faapea le mamalu i taitai o le Ekalesia ma le aufaigaluega a le Atua. Le Afioga i le Taitaifono Susuga i le Toeaina ia Tavita Roma FT, o le sa ia ta'ita'ia le sauniga. Susuga i le Sui Taitaifono Susuga a Tauti'aga Senara FT ma le Laulau a le Fono Tele; le Taitaifono o le Komiti a le Au Toeaina Susuga

Peleti To'ailoa FT, Toeaina, Faifeau ma Faletua.ma nisi e toatele o le Ekalesia.

Ua 116 tausaga o tupoupou i le ogatotonu o le laumua o le Ekalesia Faapotopotoga Kerisiano Samoa - EFKS. O le Magalafu e fitifiti atu ai 'aloiafi o le Tala Lelei lea e faamanatu i le Faamanatuga, e pei ona saunua le Taitaifono o le Komiti a le Au Toeaina, Susuga i le Faifeau Toeaina o Peleti To'ailoa FT, i le taimi o le Faamanatuga lea na ia ta'ita'ia i le Sauniga Faai'u o le lupeli i Malua, Aso Tofi, 29 Aokuso 2013.

O le Moli o le Ava i le galuega tala'i a le Ekalesia. O le ofaga lava na fofoa ma faafailele atu ai lupe faalele o le Tala Lelei, ma felelele atu, e faatino le finagalo o le Faaola na fetalai ai - ".....ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Pa'ia; ia outou a'oa'o atu ia te i latou ia tausii i mea uma na ou fai atu ia ia te outou; faauta foi, ou te ia te outou i aso uma lava, e oo lava i le gataaga o le lalolagi."

Afemata T. Apelu Aiavao
Faatonu Sulu Samoa

O LE LAUGA

mai le itulau e 2

ai foi, oloo logolelei i lona finagalo le i'uga a le Fono Tele pei ona tatou amata faatino nei. Tatou te talitonu foi e le ona o se fia faalialia e mafua ai lenei faamoemoe, ae ona ua tatau ona fai se galuega fou ma se mea sili atu mo lo tatou Atua. Ua tatau ina ua le matua talafeagai le tulaga ua iai nei lenei maota tapua'i.

Ua tatou malamalama i le tala faasolopito o nofoaga tapua'i o tagata Isaraelu ma lona mataupu silisili; e faatuputupula'ia mai lea taimi i lea taimi. E le tumau ae atia'e faasolosolo mai le mea o iai, i se isi mea e sili atu. Sa fua lava foi fausaga i lona talafeagai mai lea taimi i lea taimi.

Pei ona silafia sa amata mai le taimi o le auga-tama e oo mai i le taimi o Mose, sa iloga nofoaga faapitoa pei o Peteli, o Peresepa ma le mauga o Orepa poo Sinai. Pei e seiloga e o i nofoaga ia ona mafai lea ona fesootai ma le Atua.

O le mae'a o le Feagaiga i Sinai na fau ai le Atolaau ma malaga faatasi ma le nuu i lo latou o atu i Kanana, ae faamautu le Atolaau i le Falefetafa'i o le Potopotoga e fai ma fale tapua'i.

Ua taunuu i Kanana ma taape ai le nuu pei ona tofitofi e losua le ituaiga ma lo latou eleele, ona faatuina lea o aai e tolu e fai ma nofoaga o tapuaiga faitele, o Kilikala mo nuu e taulalata iai, o Sekema mo nuu e taulalata iai, atoa ma Sailo mo nuu e taulalata iai.

Mulimuli ane e pei ona finagalo iai Tavita ae faatino e Solomona, o le malumalu e tasi i Ierusalem e o ae uma iai ituaiga e sefulu ma le lua o le nuu i ona Tausamiga faapitoa.

O le matagofie o le malumalu na faia e Solomona, ae na lepetia

ma faatafunaina e Papelonia. Mulimuli ane na toe fausia ai i lalo o le taitaiga a Serupapelu ma losua, i le toe a'e mai o le tafeaga. Na fai ane ai le perofeta o Hakai: **"O ai so outou na iloa lenei fale i lona ulua'i matagofie? Pe se a la outou vaai nei iai? E le peisea'i ea ua leai i o outou manatu, pe a faatusa ma lena?"**

loe, e tупutupu faasolosolo le lagona fia fai mea sili o le tagata mo lona Atua. O foliga foi ia oloo iai nei le atiinae o falesa i le Ekalesia. E sili atu le fale fou nai lo le fale muamua. E faapea foi i lenei malumalu e pei ona faaigoaina ai o le IUPELI. O lenei fale na fausia e faamanatu ai le 50 tausaga o Malua i le 1894, na sui ai le faletapu ai tuai fai mai o le fale vali e fau i fausaga faa-Tahiti, ae ato i lau Samoa. Lea foi o le a faia se fale fou, ma ua fuafua ia sili atu nai lo lenei.

O le fia faia o le mea sili talafeagai na finagalo ai Tavita e fau le malumalu i Ierusalem. Sa faapena lagona o Serupapelu ma losua ina ua toe fausia le malumalu fou i Ierusalem. O le agaga foi lea ua finagalo ai le Fono Tele e fau se malumalu fou i Malua nei, ia sili atu lona matagofie, ma ia sili atu lona tala feagai. O le a saunia foi e le Atua ni tupulaga o le Ekalesia i le lumanai, latou te fausia se isi malumalu e sili atu nai lo le o le a tatou faia i o tatou taimi.

Lagona na e fetalai mai ai lou Atua: **UA LELEI INA UA I AI I LOU LOTO E TE FAIA SE FALE MO A'U**

Ae talofa! Le Ekalesia e, nei tetena i lou finagalo lagona faatiapolo oloo faaleo e le toatele i tusitusiga e faasea ai i le fia fai mea sili o le au faatuatua. Lea

ua latou faaoga ai le upu **MATIVA** ma le upu **TAUGATA** e fai ma auupega e osofai ai lou fia fai mea sili. O le filosofia masani lea a le lalolagi, e fua le mea sili i lona tau. A o le silasila a le Atua, e fua i le loto ua manatu e fai le mea sili, e le afaina le tau, aua o le pitolaau lena a le Atua. Lea e logologoa ai le upu a le toeaia mai Uro i Kaletaia fai mai: **"E aumaia lava e leova le mamoe e osi ai le taulaga."**

O le faasea foi a le ausoo i le tamaitai ma lana fagu alapasa, lea fai mai ua maumau le uu taugata, ana faataua ua maua ai se tupe e tufatufa ma tagata matitiva. Fai mai le fetalaiga a Iesu: **"Se a le mea tou te faalavelave ai i le fafine, aua o le mea lelei ua faia e ia ia te a'u nei, aua tou te nonofo pea ma e matitiva."**

Le Ekalesia, afai e taugata, a o le mea sili lea ua e finagalo iai mo le Alii, e toe tuu i fea?

Lo ta avanoa lenei, e sasaa faaoti ai la ta fagu alapasa ae se'i masua uma atu la ta uu nato, e le afaina lona taugata, ae avatu ma o tatou loto, e nanamu ai lo tatou Atua i le manogi sasala o lo tatou fai mea sili.

Tatou te faamavae nei ma le loto faafetai tele i le sao taua o lenei fale mo le galuega o le Tala Lelei a le Alii i Samoa ma le Pasefika, lona sao taua i le atiinae o le Ekalesia Samoa i Samoa nei ma atunuuu i fafo; ia manatua pea ma le loto faafetai lenei fale mo le viiga o le Atua.

A ia tatou tulimatai foi ma le loto faatuatua le faamoemoe o le Ekalesia ua taoto, mo le fausia o se fale e sili atu mo lona viiga. Sauni e galulue ma le mautinoa, **o le mea ua iai i lou loto, ua lelei lea i le Atua.** AMENE.

**O you mighty little raindrops! How I wish
you'd go away,
For you keep me in the schoolroom, when I
might be out at play**

Lauga Lotu Au Taumafai

Aso Sa 5 Me 2013 EFKS Brisbane - Queensland, Australia

lalolagi. A o Keriso lava, o le mulitu'i o le laupola, o le faiva o le tai tatau."

Tusi Faitau: Filipi 2: 5-9
Kolose 1: 15-20

Matua: Kolose 1: 20: "Ina ia faalelei e ia o mea uma lava ma ia, o mea oi le lalolagi, ma mea oi le lagi."

Maga 1: Ua ia faamagaloina a tatou agasala.

Autu: "O le 'au'aufanua o Keriso, e le gata ua tatou magalo ai, ae ua tatou lelei ai foi ma le Atua."

"O le Tulupae poo le Tuluipae i le Mau a Samoa"

O le tulupae poo le tuluipae, o le vaega lea o le paepae o le fale, e pa'u iai le tulutulu o le timu. E 'apo e le niufafo mataua o le timu, ona faatafe lea i lalo i le tulupae o le fale.

O le mafuaaga lea, o le vaega lea e aupito i sili ona mama o le fale, o le tulupae, aua o le vaega lea o le fale, e tele atu mataua o le timu na te maua, nai lo se isi lava vaega o le fale.

E le gata ina mama, ae iloga lelei vaega o le tulupae e pa'u iai le timu.

E lua lalolagi o le tulupae, e iai le taimi e ufitia ai i le paolo, ona maua lea o le lalolagi o le pogisa. E iai foi le taimi e laina ai, ona maua lea o lona lalolagi o le malamalama, e fua i le oso, o le tu sa'o, ma le taugagaifo o le la. O lona uiga, e mafai e le tulupae ona ola i lalolagi e lua, o le taimi o le malamalama, ma le taimi o le pogisa.

E faiā ma aiga le tulupae i mea uma e lua, **o totonu o le fale, ma fafo o le fale**, o le faia o le tulupae i totonu o le fale, o ia e **faaulufaleina** le tagata mai fafo i

totonu o le fale.

O le faia o le tulupae i fafo o le fale, o ia e **faaulufafoina** le tagata mai totonu e fia ulufafo, o lona uiga, e le **vavaeina** e le tulupae, ia fafo ma totonu o le fale, ae **faafesoota'i**.

I le mau faa-Europa, e feteena'i fafo ma totonu o soo se mea, e feteena'i le tino i fafo ma le agaga i totonu, o le mafua'aga lea e fete'ena'i ai le tino ma le agaga, i le vaai a Europa. O le mafuaaga foi lea e feteena'i ai le lotu ma le aganuu, o le Atua ma le lalolagi, ina ua o mai misionare. E le mafai ona fealofa'i ma fesoota'i nei mea, e ui ina eseese.

I le mau a Samoa, e fesoota'i fafo ma totonu, le tino ma le agaga, o le lotu ma le aganuu, o le Atua ma le tagata, o le lagi ma le lalolagi. O le matafaioi lea a le tulupae, o le faafesoota'i o mea ia e lua. A ta'u le fale o le Samoa, e le na o totonu o le fale (inside). O le fale e aofia ai fafo, le tafafale, (e aofia ai tuaoi), o lumafale, (e aofia ai malae ma le sami), ma le tuafale, (e aofia ai le taloloa, le tuasivi ma le tuai'a), o mea ia e fausia le lotoifale o le **fale** o le Samoa.

I le mau a Samoa, e le ola le fale ona o mea e maua mai i lumafale, tuafale, ma tafafale, e **ola** le fale, ona o le tofa e tausi ai le fale. O le tofa lea e alu atu ai le faatonuga o le tausiga o le sami, o le vao, ma le nuu, o lona uiga, **e le sau mai fafo o le fale, ae sau mai totonu**.

O Iesu Keriso, o le Tulupae a le Atua.

Ina ua tuga le gasegase o le tagata ona o le agasala, ua faasillitifo mea uma na te faia. Ua le toe nanea se mea i le Atua, leaga ua sopo tuaoi le tagata i le Atua, ona finagalo lea o le

Atua, ia saili i lona lava lotoifale, se na te fofoina le tuga, o le gasegase o le tagata.

O le mea ua tupu, ua toe 'a'apa le Atua i lona lava lotoifale, ia te ia lava, e fofo ai le faafitauli o le tagata agasala, o le ofoina mai o Iesu, o le ofo na afua mai i le lotoifale o le Atua. E le o se ofo na faatau ofo, ae o le ofo e tu i luga o le leai, i le gagana Eleni, e ta'ua lea ofo, o le kenosis.

Oloo tau faamatala e Paulo i le Ekalesia i Filipi, le Atua e ta'ua o le **kenotic God**, o le Atua e ofo, e le fuaina i se isi. E to'ese lona mamalu, e faamamalu ai isi, e to'ese lona tamaoaiga, e faatamaoaiga ai isi, e to'ese lona soifua paia, ia ola ai isi.

O le mataupu lenei o le **ofo faale-Atua**, e lavea ai totonu le **to'ese** o le Atua ina ia **faaopoopo** mea i le tagata, o le ofo a le Atua, na uma mai iai lona soifua paia, peita'i, e le'i papa'u ai lona lotoifale.

O le fetalaiga manino a Iesu, **aua ai se faasaogalemuina lona ola, e maumau ai ia te ia, a o le faamaumau lona ola ona o a'u, e maua e ia** (Mareko 8: 35). O lona uiga, o le tele o le soifua to'ese, o le tele foi lea o le soifua e faaopoopo. Fai mai Paulo, o Iesu o ia sa **uiga faatasi ma le Atua** (f.16).

O le mea ua tupu, ua avea le aapa o le Atua i lona lotoifale, ma mea ua tilofia ai uma, ma **totonu o le lotoifale o le Atua**. Aua o le finagalo o le Atua, ia silafia e le lalolagi, le tofa oloo tausi ai le lotoifale o le Tama, le Alo ma le Agaga Paia. O lea tofa, o le ALOFA e afua ai ona faamagalalo, ona amiotonu, ona faaaloalo, ona agamalu, ma ofo le ola, na tino lava i le soifua o Iesu lea tofa.

O le mau a Paulo, **ua faamaualalo o ia ia te ia, ua fai mona le uiga o le pologa, ina ua faia o ia faapei o se tagata** (f. 7). A toe faaupu, ua avea Iesu

faaauau itulau e 11

IOANE HASI - Tamā o le Toe

Fuata'iga - 1372 - 1415

Na o le tasi le masina talu ona taunuu loane Hasi i Konesitane, ae asiasi atu ni epikopo se toalua ia te ia i le mea oloo mau ai, faatasi ma le pulenuu o Konesitane, ma se naite (fitafita). Na latou faaali atu ia Hasi o i latou na o atu i le faatonuga a le pope, faapea ma le katinale. Na latou faaalua foi, oloo fia talanoa le katinale ia te ia.

E ui lava na logoitino e se tasi o fitafita o puipuia Hasi e pei lava na te le talitonuina ia tagata, ae na faato'ato'a o ia e Hasi ma fai atu e leai se mea o iai, aua le popole. Ina ua taunuu atu i latou i le maota o le pope, ona talanoa atu lea ia Hasi le katinale i se taimi puupuu lava, ona ia tuua ai lea o le potu. E ulufafo atu le katinale ae ulu mai i totonu se faiaoga o mataupu silisili, e teu mai e pei o se patele. Na fesili atu o ia ia Hasi pe talitonu o ia i le faiga faamasinoga e taofia ai le tagata seia oo i le aso o le faamasinoga. Na tali Hasi e le talitonu iai. Ona talanoa lea o le tagata lea i isi mea, ae toe fo'i mai lava i le fesili lea. E le suia lava le tali a Hasi. Ona toe talanoa foi lea le faiaoga i isi mea ae fai lava ma fo'i mai i le fesili autu, pe talitonu Hasi i le taofia o le tagata e faatali ai le aso o lona faamasinoga. E le suia lava le tali a Hasi.

Na oo lava ina tuua e le faiaoga lea le potu ma le faanoanoa. Ina ua alu, ae ta'u ane e le fitafita naite ia Hasi, o le faifeau lea ua ulufafo atu, o se tasi lea o "fai'ai" iloga o mataupu silisili i le atunuu o Italia.

I le Potu Taofia

Ina ua po, ona faailoa lea i naite poo fitafita o puipuia Hasi

e o latou e malolo ae nofo na o Hasi. Na matua ita naite (knights), i le mea pi'o ua fai, ma na oso atu se tasi o latou i le potu o iai le pope ma katinale, ma 'ava'avau atu iai i le leaga o le latou mea ua fai.

Ae na faato'ato'a atu e le pope le naite ma fai atu iai na te le'i faatonuina le taofia o Hasi. Na fai atu foi i le naite o le a vaai lelei pea Hasi. Aua ia manatua, ua faatagaina lava Hasi e sau i Konesitane e faaali ona talitonuga ma tali ai i ona tuua'iga. Ua leai nei se mea e mafai e naite, a ua tuua e i latou le faletaofia, a ua fo'i i o latou aiga. Ae mulimuli ane, i se tusi i le lunivesite o Pare, na ta'utino ai e le pope e moni o lana faatonuga na pu'eina ai Hasi ma taofia i le falepuipui.

Na mumu faaafi le salalau atu o le tala ua taofia Hasi i le falepuipui. Ina ua faalogo iai Paleka, ona sisiva ai lea ma se isi o ana uo i totonu o le potu o nonofo ai, ma fai ane, e le toe mafai ona sola Hasi ma i latou. Ae faigata lava ona talitonuina, o aso ua mavae, o Hasi ma Paleka o ni uo mamae lava i la'ua.

Ina ua te'a aso e valu ona aveina ai lea o Hasi ma loka i se potu taofia i se tasi o monaseri i se motu e feagai ma matafaga o le Vaituloto o Konesitane. Na loka o ia i se potu pogisa ma le susu ma lata i alavai lafoa'i leaga. Toetoe a maliu ai Hasi i le mea lea ona na ma'i tigaina ai i le leaga o le mea ua nofo ai. Ae na ala ona toe malosia ona ua asiasi atu iai le foma'i a le pope ma faatonuina le sui o le potu e tnofo ai Hasi. E tolu ma le 'afa masina na loka ai Hasi i le potu lea. O aso na taofia ma loka ai

Hasi i le nofoaga lea, na avatu ai ia te ia tusitusiga e 45 a loane Uikilifi, e sui o le komiti o le a suesueina o ia, ma togi atu i ona mata ma le ita ma le inoino ia Hasi. Na fia iloa e sui ia o le komiti pe lagolagoina e Hasi tusitusiga uma ia e 45 a Uikilifi.

Na o le vaavaai atu Hasi ma le toto'a i mata ita ma le sau o nei tagata, ona tatalo ai lea i le Atua ina ia avatu ia te ia le potu e tali ai i fesili. Sa tali o ia e na te le lagolagoina ni tusitusiga o iai e sese. Ae le'i malilie ai nei tagata, a ua 'ava'avau atu ia Hasi ma taumafai e faasufi mai ni tali e mafai ona latou tuua'iina ai o ia. Ma le filemu lava, na tali atu ai Hasi e faapea, o le a ia tusia ni tali e uiga i manatu o faaalua e Uikilifi, ma tuuina atu i le fono na valaauina o ia e alu atu.

Na manatu Hasi na te mana'omia se loia, ae le'i talia lona mana'o. Ona amata tusitusia ai lea e Hasi ana tali, fai mai a ia e na te le lagolagoina ni vaega se 32 o manatu autu o Uikilifi, ae talitonu i vaega e 13, pe a uma ona fai iai ni suiga laiti.

Ae ua faanoanoa lava Hasi aua o lona manatu na ala ona sau i Konesetane ina ia mafai ai ona ia tali atu i mea ua tuua'iina ai o ia, ae le o mea o tetee ai le fono ia Uikilifi. Aisea ua suia ai ato le mataupu? Na manao o ia e tu atu i luma o le fono ma tetee i ona tuua'iga, ae le o le lokaina o ia i se potu pogisa ma le malulu ma palapala.

Ua filifili nei o ia o le a matua tautala malosia faasaga i ona tuua'iga, e aofia ai ma le taofia faamalosi o ia i le potu pogisa e aunoa ma sona faamasinoga.

Na matua oo i uo a Hasi i Paraka le loto tiga ina ua taofia faapagota o ia, ma ua popole ne'i faasalaina o ia e aunoa ma se faamasinoga e faia.

I le aso 4 Ianuari 1415 na toe fesiligia ai Hasi e uiga i mataupu e 45 o talitonuga o Uikilifi, ae

faaauau itulau e sosoo ai

O le 'Ofu

faaauau mai le itulau muamua

lumana'i, aemaise lava lona talitonu i le Atua ma lana galuega, lea ua galulue ai ma lona to'alua o loane.

O loane e le to'afilemu ona uiga. E maitaita ma le lava onosa'i i le mea ua tofia nei iai i le galuega a le Atua i laufanua o faato'aga i Uisikosini. E nonofo i le mea lea, ae moomoo i faletusi ma le olaga i Niu loka poo Sikako, o ina na a'oga ai i le

seminario. E matua ma'ama'ai lava le mafaufau o loane, ma fiafia i le faitau tusi.

A o Maria, na te matauina le matagofie o le tele o mea o le siosiomaga, le manogi o le 'ele'ele faato'a mae'a ona suotosinaina; o le malie o pesega a manulele; o foliga o lau o laau ina ua amata le taumafanafana; o fuga o laau ma o latou lanu eseese. E pese Maria i le matagi, ma pepese faatasi ma manufelele. O le agi malu mai o le matagi, o le malie foi lea o pesega a manulele, ma Maria.

E ui lava i nei mea e tele e fiafia iai Maria, ae iai le mea lava e tasi e moomoo lava iai na te fia maua i le amata o le tau e totogoa'e ai mea - Spring!

O se 'ofu! E le se 'ofu e pei o 'ofu lanu uli o faletua o faifeau. A o se 'ofu umi felanulanua'i a malosi le savili ua tau masu'esu'e i luga lona pito i lalo. O se 'ofu e fai ni ona leise i le ua ma tapulima, ae iai sona fusi lautele i le puimanava.

Ae leai se tupe! O ia o le to'alua o le faifeau, e le tele se tupe e maua i le galuega. Ona

faaauau itulau e sosoo ai

IOANE HASI - Tama o le Toe Fuata'iga - 1372 - 1415

tumau lava le tali a Hasi. Mulimuli ane i le masina lava lea na maua atu ai e Hasi se tusi mai se tamalii o Pohemia e faapea ua mae'a ona ia talanoa ia Sikimani ma maua mai ai le faaaliga o le a tuuina atu lava se avanoa e faaali ai e Hasi ona talitonuga i luma o le fonu. Ae na fiu Hasi e faatali, e leai lava ma se tala na ia maua i totonu o lona potu pogisa. Ua amatamata lava ina faaletonu lona soifua, ae sa fai ana tala malie e faatatau ia ia lava ma faapea ane, o ia o le manu o le kusi e le'i mafai lava ona fasi mateina.

O le amataga o le tau e totogo a'e ai mea na toe faaleaogaina ai e Sikimani folafolaga uma ma faatagaga na tuuina atu mo Hasi.

E le'i faamalieleina finagalo o le komiti na suesueina Hasi i moliaga na tuuina atu i le aso 6 o Tesema, ona faatonuina ai lea o Paleka e tuuina atu se lisi o mea uma ua mafua ai ona molia o Hasi, mea ia oloo iai i ana tusitusiga. Ina ua faalogo iai Hasi, ona ia tusi ai lea i ana uo:

"Oloo taumafai lava Paleka ina ia faamaonia moliaga. Tau ina ia faamagaloina o ia e le Atua, ma foa'i mai ia te au le malosi. Na o le nofonofo o Hasi i lona potu pogisa i lea aso ma lea aso, ma mafaufau i ni mea pepelo o tusia e Paleka e tuua'iina ai o ia.

E luasefulu itulau o tusitusiga a Paleka na fai, o tusi ai i lalo ni mea fai mai a ia o ni aoaoga sese a Hasi. Ina ua maua e Hasi se kopi o ia tuuaiga, ona ia tali ai lea iai i se tusi na ia faia i se po e tasi. Na ia tali foi i le fesili: "E moni na e fai mai o le pope o le anitikeriso." Na tusia e Hasi se tali ma auina atu ia Paleka: "Afai o le ituaiga olaga o ola ai le pope e le tusa ma le silafaga a le Atua, ioe! o ia o le anitikeriso."

Na faitau Hasi i moliaga pepelo na fai aga'i ia te ia e Paleka, ona tali ai lea o ia e faapea, "Afai o iai nisi o ana tali e sese ma le tusa ai ma le Afioga a le Atua, ia faaali mai ia te ia ona ia faasa'oina lea. Ona pau lava lona o le mea e mana'o o ia iai." O le a salamo foi o ia pe afai e maua e se isi ni ona manatu e le tusa ai ma le Afioga

a le Atua. E leai se isi na tali. E leai se isi o le fonu na amana'ia lea mana'o o Hasi.

E oo atu i le taimi na faitauina ai tali a Hasi, a ua talitonu le fonu o le tele o tuuaiga na fai e Paleka, e le faamaonia. Ae le solomuli ai lava Paleka i lona taumafai e faaleaga Hasi. Ona ia toe tusia ai foi lea o isi moliaga e 13, fai mai o mea na te manatua mai a latou talanoaga i tausaga ua mavae ma Hasi, Sitanisilava ma ia (Paleka).

O le Ositaulaga o Tagata Faatuatua

Ua amata lava ona tupu tele eseese ina ua faataga e le 'au fuata'i (reformers) o Sekisolovakia se mea fou i le Faletapua'i i Peteleema, o le tuuina atu lea o le Ipu ma le Uaina i le 'au tapua'i i lea nofoaga. Ua le na o faifeau latou te tagofia le areto ma le uaina, a ua tatala atu i tagata lautele o le faapotopotoga. O lenei faiga na avea mulimuli ane ma totonugalemu o le mafuaaga o se taua mata'utia i le va o le 'au Hasite (Hussites) poo tagata e lagolagoina Hasi, ma le Ekalesia Katoliko Roma.

O le amataga o le tau mafanafana, na avea ai lenei suiga ma mea na faatupu ai se

faaauau itulau e sosoo ai

O le 'Ofu

mai le itulau e 7

fai ai lea o se fuafuaga a Maria. O le a ia amata ona faaputu nai pene i le 'apa, a oo ina lava ona ia faatauina ai lea o se moli karasini mo loane e faitau ai ana tusi, ma sona 'ofu oloo moomoo iai. O le a tala mai le leise oloo i le 'ofu tuai, e su'i i le 'ofu fou, a o se leise e totoe, e tuu e su'i i se 'ofu lanumoana mo lana pepe o Louise.

Na lava loa le tupe, faatau loa ma le 'ie ma amata ona su'i le 'ofu o Maria. Na faaopoopo atu le leomalie o pesega a Maria i le pa'o o lana laau su'isu'i. A o lana tama o Louise lea ua taalo i isi filo o le su'isu'iga. Ua mumu foi le moli karasini i luga o le laulau e faitau tusi ai loane lona to'alua.

Ua siva fiafia nei Maria, siva atu i o, siva mai iinei; tago ua tatala le fusi o lona laulu ae faapa'u i lalo, ma siva lava a ua lelelelea lona laulu seea ma ufi ai ona mata i isi taimi. Ona tago

atu loa lea ua 'ofu lona 'ofu piniki ma viole ae fai leise. Avatu ma le fusi ua fusi i lona manava, ae matamata fiafia Louise, ma taalo.

O le tau e totogoa'e ai mea - spring! E talavou o ia; talavou lona tino aulelei ma le manaia, faato'a 23 tausaga. Ma o lea fo'i ua amata tafiti mai le isi ana tama i totonu o lona manava. E pei e fiafia mai ai ona o le siva fiafia o lona tina.

O lenei nofoaga mamao ese ma aai tetele o Amerika, ma le matua malulu o le taumalulu, ua nofo mamao ai le teine talavou o Maria, ona o le galuega a lona to'alua, o le faifeau mo tagata sulufa'i atu i lona atunuu e saili ai so latou manuia.

Ae na avea le tumamao ese o lenei nofoaga ma aai tetele, ma mea e malie ai pese a Maria, ma maua ai ona taimi e tusi ai ana solo ma lau iai ona lagona faateine talavou, ma ua faatupuina ai foi lona alofa i tagata sulufa'i mai isi atunuu, ma ua latou femiomio faatasi ma ola faatasi

ma tapua'i faatasi.

A o le aso lenei, ua matua fiafia o ia i lona 'ofu ua na o le lelelelea i le savili o agi malu mai i faato'aga ma aumaia le manogi fou o le 'ele'ele ua suotosinaina., Ua atili ai ona siva ma taavili solo pei lava o uosi ma se isi.

Ae te'i lava ua se'i o ia e lona toalua. Toso tata atu ia, 'u'u ona tau'au i ona lima malolosi ma 'ava'avau atu, "Ma'imau tupe i mea le aoga! Leai ni tusi! Leai ni faletusi! Leai nisi e talanoa iai na o povi ma moa, ma suotosina le 'ele'ele ma toto meatoto, ae te alu faatau lou 'ofu." Ua matua masaa atu le ita o loane i lona to'alua. Ma tago atu ua saei le 'ofu mai le tino o Maria!

E punou ma le faanoanoa Maria ma tagi, ae na te faalogoina le pa'o o vae o le solofanua a lona to'alua ua faasiiva elua ese atu ma le fale. Ae matamata ane iai a la povi ma o latou mata lapopo'a, ma moa na o le fefulia'i o latou ulu e

faaaauau itulau e sosoo ai

IOANE HASI - Tama o le Toe Fuata'iga -

1372 - 1415

vevesi tele na fai ma mea e faatonuina ai e le fononua ina ia aua ne'i toe tuuina atu le uaina i tagata e le ni faifeau. E matua faasalaina le tagata na te faia lea mea. A faia e se faifeau, o le a matua faasalaina foi o ia. A ia faaaauau pea ona tuuina atu le uaina i tagata lautele, o le a tuuina atu o ia i faasalaga faalemalo.

Ina ua faalogo iai Hasi, ona ia fai mai ai lea, "O se i'uga matua valea lava lea mea ua faia e le fononua." Fai mai a ia ua faasili faiga faa-Katoliki i lo le Afioga a le Atua, ma se faiga na faavaeina e Keriso lava ia. E le

talitonu Hasi i le na o le faifeau, e inu i le uaina oi le Ipu o le Faamanatuga.

Na tusi mai Hasi mai lona potu o taofia ai o ia, i le 'au faatuatua ina ia latou tetee i lea faatonuga mai le pope, ae faaaauau pea ona auai uma tagata faatuatua i le Ipu o le Faamanatuga. O se mea lenei na matua lagolagoina e Hasi, o se talitonuga oloo 'apo'apoina pea e tagata Porotesano uma. I nei aso, a e auai i le Faamanatuga i le malumalu, faafetai ia Hasi ma i latou sa lagolago ma mulimuli ia te ia, ona o lo latou sailia o lo latou aia e auai i le Ipu o le Faamanatuga.

Sa faaaauau pea le ita o tagata o lagolagoina Hasi ona o le lokaina o Hasi i le potu taofia e aunoa ma sona faamasinoga. Ona e le'i mana'o Vakalava e aafia ai i le mataupu o fe'ese'ese

ai, ona sainia ai lea e nopele poo tamalii o Sekoslovakia se pepa e tusia uma ai o latou igoa., ma tuu iai a latou faamaufailoga aloa'ia, e faailoa ai lo latou tetee i sauaga o faia ia Hasi. Ina ua maua e le Fono o Konesitane lea lisi ma mau tetee, ona faatonuina ai lea e le Fono ia nopele e to'a 452 ina ia oo atu i luma o le Fono. E leai ma se isi o latou na usitai iai.

mai le tusi: **"God's Generals"** tusia e **Roberts Liardon**, faamatalaina e Afemata T. Apelu Aiavao (e faaaauau i le Sulu o Oketopa)

He who sets out to change individual lives may be an optimist; but he who sets out to change society without first changing the individual is a lunatic
Dr. S.M. Zwemer

O le 'Ofu

mai le itulau e 8

pei e tuufesili poo le a le mea ua tupu. A o loane, na o le fia alu ese atu ma Uisikonisini ma alu i Niu loka e maua ai faletusi mananaia e tele ai tusi e faitau ai.

Ua tago atu Maria ua sii mai lana tama, ma tosotoso mai le 'ofu ua masaesae, ma sii faatasi ma lana tama. Ma tagi!

Ua matua tagi masusu Maria. Ua fia alu i lona tina e maua ai se fesoasoani. E leai se isi e sulufa'i iai i lenei nofoaga e na o tagata sulufa'i foi.

Ona ia manatua ai lea o le Salamo e 34: 4: "Na ou saili atu i le Alii, ona tali mai ai lea o ia ia te a'u, ma na lavea'iina a'u ai mea uma na ou fefe ai."

Ona matua tagitolulotu ai lea o Maria. Aueue! Ua tagi i le Alii e fesoasoani mai. Ua tagi atu ai foi ma Louise i le tagi o lona tina.

Ina ua to'a filemu Maria, ona mafaufau ai lea i se mea na te faia e alu ese ai ma le tulaga ua iai nei. Ua mafaufau nei o ia o le a fai so la moega ma Louise i le vaega e teu ai o latou lavalava i le fogafale i luga. Ae tuu loane e moe na o ia. Ona gaugau ai lea o le 'ofu masaesae lea na agi faaafa iai le ita o loane, ma sulu i lalo o isi ona 'ofu.

Ua ia iloa o le a asiasi mai le faifeau o Haniseni i le latou aulotu. O le a saili nei e ia se avanoa e faaali atu ai ia Haniseni lona 'ofu ua saeia e lona to'alua, ma ta'u iai o le a le toe nonofo ma loane ae o le a toe fo'i i lona tina.

Ua 'ofu nei lona 'ofu faafaletua o le faifeau, ma selu lona lauulu ma fusi i tua i se faapatu e pei ona masani ai faletua o faifeau. Ina ua fo'i atu ioane ua leva le po, na ia maua lana meaai o faamafanafana i le ogaumu. A o momoe Maria ma lana tama

o Louise i lo la moega i luga o le fale.

Na 'ai to'atasi loane, ona amata su'e ai lea e ia o Maria ma Louise. Na tau atu iai o momoe mai i luga o le fale, ona ia faatonuina lea o Maria e o mai i lalo i lo la moega, ma tuu Louise i lona moega. Na tuu e Maria lana tama i lona moega, ona ta'oto ai lea i lalo i lo la moega ma loane, e pei ona faatonuina ai o ia e lona to'alua. Ua te'a le ita na agi faaafa o loane, ae na te le o iloa i le taimi lea, oloo tumu le loto o Maria i le taetafe o lana mea na fai ia Maria.

Ua faasolo mai aso, a ua leai se pese i le loto o Maria. Ua tumu lona loto i le ita i lona to'alua. Ua faatalitali mo se avanoa e alu ese ai ma le fale o le galuega. Ua fia tau ma sui.

O le taunuu atu o Haniseni, na matua fiafia ai loane, ma talanoa faatasi ai i tusi, ma faletusi, ma le galuega a le Atua i Uisikonesini, ma mataupu silisili tau le Atua. Ae laulau mai lava taumafa e Maria ma le laumata fiafia. Ae le iloa atu i totonu o lona loto, oloo tumu i le vevesi ma le faaletonu. I le sauniga lotu, sa tapua'i faatasi lava ma le 'au faatuatua, ae na te le'i lagona le tele o upu o lauga na fai.

Ua taufaai'ui'u le sauniga mulimuli, ae le'i maua lava se avanoa e feiloai atu ai Maria ia Hanisoni ma faaali iai lona mana'o ua fia tete'a ma lona to'alua.

Totoe nei na o le sauniga i le afiafi. Ona toe pau lava lea o le avanoa mo Maria e feiloai ai ia Hanisoni. Atonu foi e maua mai ai i le lauga se ta'ita'iga mo ia i le mea e tatau ona ia faia.

Ona amata ai lea o le sauniga.

"E maua mai le tatou matua i le Mareko 11: f 25: "A outou tutu ma tatalo, ai se mea tou te tiga ai i se tasi, ia outou faamagaloina, ina ia faamagaloina foi e lo outou Tama o i le lagi a outou agasala."

"O le faamagaloga, o le filifiliga a le loto o le tagata ina ia faamagaloga, o le usitai lava lea i le Atua. E mulimuli mai i lea, lagona, lagona o le to'afilemu o le loto. A tatou tuu atu i le Atua o tatou tiga ma manu'anu'a ma le le mautonu, ona lilligi mai ai lea e le Atua lona alofa i ou manu'anu'a, ma na fofoina ou tiga ma faafitauli."

"Oi e leai!" O le tagi lea o le loto o Maria. "Leai! Leai! E le mafai ona ou faamagaloga. E le mafai!"

Ae faaauau pea le lauga.

"E le taumate e iai se isi e manatu na te le mafai ona faagaloga, Tusa lava pe a mafai ona ou faamagaloga, e le mafai ona ou faagaloina. E moni e le mafai ona e faagaloina, ae le afaina, aua e te popole i le galo ia te oe o le mea na tupu. O le alofa ma le faamagaloga a le Atua, e faifai malie ae oo lava ina mavae atu ai lou manatua o le mea na tupu. A e faamagaloga, ia e lafoa'i foi le mea e faigata ai ia te oe ona faamagaloga, ae manatua na o le alofa."

Tuu le lotu, ona o faatasi ai lea o loane ma le faifeau o Haniseni i le taavale solofanua faatasi ma le Tiakono o Oloseni. Ae oso Maria i lana solofanua, nonoa lona lauulu uumi se'ea uliuli i le fusi, ma faatietie lelei Louise i ona tua ma fusi atu i lona tino i le 'ie ma o i lo latou fale. Ma le maligi o ona loimata.

Ua na iloa nei lana mea o le a fai. O le a usitai i le Atua. Ua oso i lalo mai lana solofanua o Dolly, ma afisi atu Louise ma tuu i lona moega. Ona alu atu ai lea ma susu'e le pusa na tuu ai le ofu na saei e lona to'alua. Ua tete ona lima a o tago atu i le 'ofu.

Oloo i le ogaumu le meaai o faamafanafana ai. Ua tago atu ua toe togi isi fafie i le afi, ma toe sa'eu. Ua faati'eti'e le titata mo le kofe, ma laulau le meaai.

"E tatau lava ona lafoa'i le faaauau itulau e sosoo ai"

O le Pese na fatuina e Sagato Faranisisi o Asisi

mai le itulau muamua

E tautalatala atu i latou i le mamalu o lou malo; ma ta'uta'u atu i lou mana."

O le pese na tusia e Sagato Faranisisi o Asisi, "**All Creatures of Our God and King**", ua avea ma faaaliga o le fia vivii o le 'Au Kerisiano i le Atua, ma toetoe lava a maua leni pese i tusi pese a Ekalesia Kerisiano uma i le lalolagi.

Na uluai tusia leni pese i le tausaga e 1225 ua silia i le 800 tausaga talu ai, a o le'i taitai ona oo mai le Tala Lelei i Samoa, e se tasi o poutotoa o le Ekalesia Kerisiano, ma o se toa iloga o le Tala Lelei, a o le'i vaeluaina le Ekalesia Kerisiano, o Giovanni Bernardone, lea ua lauiloa e le Au Kerisiano ma le lalolagi i lona suafa o Sagato Faranisisi o Asisi, le igoa ua filifili nei i leni tausaga e le ta'ita'i fou o le Ekalesia Katoliko Roma e fai ma ona suafa, o Pope Faranisisi.

O Faranisisi o se faifeau sa talitonu i le tatalo, ma ia sailiili i le finagalo o le Atua e ala lea i le tatalo. O se faifeau monike sa fealuai i soo se nuu e fai ai ana sauniga faaevagelia, ma lauga ai ma fesoasoani i tagata matitiva o Italia.

Na fanau Sagato Faranisisi i Asisi i Italia i le tausaga e 1182. E le'i lelei le olaga o Faranisisi i uluai tausaga o lona ola lea sa avea ai o ia ma fitafita, peitai na suia ona uiga

a o faato'a 25 ona tausaga, ma ia filifili ai e auuuna atu i le Atua, i lona faaa'oa'o lea i le soifuaga na soifua ai le Alii Faaola, i soo se mea na te fai. E ui lava o le aiga na fanau mai ai Faranisisi o se aiga mau'oloa ma le maumea, ae na fultua iai Faranisisi i lea 'oa a lona aiga, ma matua le fiafia o ia iai. Na ia fultua foi i lona tofi o le 'oa mai lona aiga, ae ia talia na o mea lava na te mana'omia e ola ai i aso taitasi. Na ia tuuina atu 'ato'atoa lona soifua e fealuai ai e fai o ia ma sui o Keriso i lona nuu ma nuu tuaoi.

Ina ua atoa le 28 o ona tausaga, ona ia faatuina ai lea o le Ituiga ua ta'ua o le Franciscan Order of Friars, lea na mulimuli ane ua avea ma se tasi o Ituiga tele e auai ni alii se toatele, ma ni tamaitai, o e na talitonu i aoaoga a Faranisisi, ma latou faaaoao iai i o latou foi soifuaga i aso taitasi.

Sa lauiloa Faranisisi i lona fiafia i le natura o mea, poo le siosiomaga o le laueleele ma le vanimonimo o ia vaavaai atu iai, ma ia iloa atu ai le 'a'ao mamana o le Atua i lana foafoaga.

O se tasi o tatalo na tusia e Faranisisi a o talavou lava o ia, lea ua fai nei ma ta'iala i le ola o le toatele o tagata Kerisiano i le lalolagi, ma sii soo i sauniga a faifeau o le Tala Lelei ia Keriso. Tatou te iloa mai ai foi i leni tatalo,

le talitonu o Faranisisi i le mafutaga vavalalata ma le Atua, e ala i le tatalo.

O le tatalo leni i le gagana Peretania:

Lord, make me an instrument of Thy peace,

When there is hatred, let me sow love,

Where there is injury, pardon,

Where there is discord, unity.

Where there is doubt, faith.

Where there is error, truth.

Where there is despair, hope.

Where there is sadness, joy.

Where there is darkness, light.

O divine master, grant that I may not so much seek to be consoled, as to console.

To be understood, as to understand. To be loved, as to love. For it is in giving, that we receive. It is in pardoning, that we are pardoned. It is in dying, that we are born to eternal life.

"All Creature of Our God and King" o se pese mai se tasi o tusitusiga a Faranisisi lea e ta'ua o le "Canticles of the Sun," faapea na tusia i le vevela o le taumafanafana o le tausaga e 1225, a o toe tasi lea o tausaga ae maliu Faranisisi mai sona gasegase tigaina, i lea lava foi taimi ua tauau atu lava ina po atoatoa lana vaai.

Sa matua faatauaina lava e Faranisisi viiga o le Atua i sauniga uma e faia, ma e sili atu i le 60 ni viiga na ia tusia mo le monaseri sa nofo ai. Na ia talitonu, o viiga, poo pese, o se vaega matua taua lava lea o le tapuaiga i le Atua.

O le 'Ofu

mafuaaga o leni faafitauli," ua faamanatu mai upu o le lauga ia Maria. "Ua ou faamagaloina oe loane." Ona tago atu lea i le 'ofu ua 'u'u mai, ae tago le isi ona lima i le faitotoa o le ogaumu fafie ua tatala. Na maligi ifo ona loimata i luma o le ogaumu a o mu mu malie le ofu i le afi.

"O le faamagaloga moni o le

lafoa'i lea o le mea na mafua ai le faafitauli." O le tata tetele o lona fatu na ia le lagona ai le savali atu o lona to'alu o loane, ma fesili, "'O le a lau mea lena e fai?"

Na tete tino o Maria i le tagi, ma fai atu, "Ua ou susunuina le ofu na e ita ai. Ua susunu! Ua susunu!"

Ae fai lana tatalo e leai se leo, "O la'u taulaga lea i le Atua!"

Ona manatua ai lea e loane lana mea na fai, ma lona saeia o le ofu o lona toalua. "Maria, faamagaloga

mai a'u." Limasefulu ma le valu tausaga ua mavae, ina ua maliu loane ma alu atu i le Alii sa auuuna iai, a ua misia lava o ia e lona to'alu o Maria.

Na fai le miti a Maria. E to'atolu agelu na faailoa atu ia te ia i le miti ma fai atu, "Sau, tatou o i le samiga." A o le lima o le isi agelu, oloo faatautau atu ai le ofu o Maria.

tusia e Margaret Jensen, faamatalaina e

Afemata T. Apelu Aiavao

Lauga Lotu Au Taumafai

Aso Sa 5 Me 2013

faaauau mai le itulau e 5

ma Tulupae, e ulufafo mai ai le Atua, ma faailoa lona lotoifale faale-Atua, i le lalolagi, ua fai lesu ma **ala** e ui mai ai le Atua i le lalolagi.

Afai o lea, o lesu o le Tulupae, o lona uiga, e lua lalolagi o lesu. O le lalolagi o le Atua, ma le lalolagi o tagata, lea e tau faamanino e Paulo, i lana tusi ia Filipi.

Na o lesu na lua ona lalolagi, e mafai ona ola i le lalolagi e lua, i le mau a Samoa, soo se tagata e mafai ona ola i lalolagi e lua, o lona uiga e **itulua**, afai e itulua lesu, sala ina itulua, aua o ia o le Atua, a o ia foi o le tagata.

O le vevesi muamua lava lea na tupu, i le uluai fono tuufaatasi, a le Ekalesia Kerisiano i le tausaga e 325, lea e taua o le Fono o Naisia (Council of Nicea). Na afua lea vevesi ona o finauga i itu e lua o lesu - lona itu tagata, ma le itu Atua.

I le tusi o Filipi, na muamua fai o ia ma Atua, a ua **toese** lona mamalu, ma faamaualalo, ua avea ma pologa, ma maliu i le satauro. Na muamua ola i le malamalama o le lotoifale o le Atua, ae na mafai foi ona ola i le pogisa o le lotoifale o le tagata, i taimi o lelei ma taimi o leaga. I taimi o le manino, ma taimi o le aava, i taimi o afa, ma taimi o maninoa, i taimi foi o manu, ma le taimi o mala.

O taimi olaola o le Atua, o taimi faigata, e ui e lua lalolagi o lesu, ae na toe foi lava i le lotoifale o le Atua, e nofo ai, aua o la lesu, e **le so le lalolagi a'u**. (Ioane 8: 23). O le toe foi o lesu, na toina ai mea sina o le lotoifale o le Atua - o le suafa e sili i suafa uma lava.

I le mau a Paulo, o le ala lava na afio mai ai le Atua i le lalolagi,

o le ala foi lea tatou te toe ui atu ai i le Atua. O le **ui** mai o le Atua, ma le tatou **ui atu**, e **ogatonugalemu** ai lesu. Epei lava o le Tulupae, o lona uiga, afai o lesu o le Tulupae na **uimai** ai le Atua, o lesu foi le tulupae tatou te **ui atu** ai i le lotoifale o le Atua, e tasi le **ala ui**, o le sau ma le toe foi i le Atua ua na o lesu.

O le le ui atu i le faitotoa...o le gaoi lea ma le faomea (Ioane 10: 1). O le tulupae lea e **faaulufaoina** le Atua, o le tulupae foi lea e **faaulufaleina** i tatou, o lona uiga, e ogatonu lesu i le **ala o le faolataga**. E ala ia lesu, ua iloa ai, e fesoota'i totonu ma fafo mai o le lotoifale o le Atua, i totonu o le lotoifale, na o le Atua sa iai. A ua avea le **ulufafo** mai o le Atua e ala ia lesu, ma ala ua valaaulia ai i tatou, tatou te **ulufale**, ma ola i le lotoifale o le Atua.

Lona uiga, o le Atua lava lea na te toe sosoo mafutaga, tatou te le'i ulufale i so tatou loto, na tatou ulufale ona o le **valaau faaloalo**, a le Atua e ala ia lesu. Lona uiga, na amata mea le Atua i lo tatou ulufale, tatou te le'i amata mea. A toe faaupu, e lei sau mai fafo **le ola o le fale**, na sau **mai totonu** i le tofa, oloo tausi ai le fale - o le Atua lea. E afua mai i le lotoifale o le Atua le ola o le lalolagi, e maualuga i le mau a Paulo, na amata mea le Atua i lo tatou faolataga, e le'i amata mea ai le tagata.

O le mau a Samoa, e fesoota'i fafo ma totonu, (inside and outside), e le pei o le mau a Europa, e fetoa'i totonu ma fafo.

A ta'u le fale, e lavea ai le lotoifale ma fafo atu o le fale, o le avea o lesu ma tulupae, e le toe vavaeina ai totonu ma fafo atu, o le lotoifale o le Atua. E

ala ia lesu, ua tuufaatasi ai totonu ma fafo, ma ta'ua o le **lotoifale o le Atua**.

Ua fesoota'i le lotu, (le talalelei), ma le aganuu, aua na fai lesu ma tagata o le aganuu, e ui o ia o le Atua, ua fesoota'i foi le tino ma le agaga, aua o lesu, o le **Atua na liu tino tagata**.

Ua fesootai le lagi ma le lalolagi, aua ua lolo'u mai le lagi o le Atua e ala ia lesu. **A lolo'u le lagi** i le mau a Samoa, ua lolo'u mai mamalu ma paia o se tamalii o se afio'aga, e talanoa pe tala lona gafa i se tagata e le o se tamalii. E ta'ua lea o le lagi felo'ua'i, o lona uiga, i le mau a Samoa, o le lagi e le o se mea e mamao ese, pe tu i le vateatea, e faasino i mamalu ma sa tatapu, o aiga ma afioaga.

Soo se lagi e le faigofie ona lolo'u, aua, e lolo'u uma mai ai ma mamalu o le aiga ma le nuu. Ua **lolo'u le lagi** o le Atua, ua tatou ola i le lotoifale o le Atua, aua ua tatou lelei ma ia, ona o lesu. E le gata ua tatou ofi i totonu o upufai o le lotoifale o le Atua, a ua avanoa foi mamalu o le lotoifale mo i tatou.

O lona uiga, ua **tasi** lo tatou lotoifale ma le Atua, tatou te le toe sailia se isi lotoifale, e ese mai i le lotoifale na faailoa mai e lesu. O lea ua tatou nofo suli faatasi, ma le Atua i lona lotoifale faale-Atua. **We do not live for God, we live in God**.

Tatou te le toe tauamo ma tulituafulu le Atua i se mea mamao, pei o le tulituliga e le i'a o le fulu o le pa, lea ua faasaga mai le Atua, o tatou faasaga atu. Ua **alo mai** le Atua, o tatou **alo atu**, o upu a le atunuu, **ua fesaga'i segaula**. Ua tatou segaula atu ai, ona o lesu Keriso. O le mea lea e ala ai ona **iloga** mea na faia e lesu, o le tulupae o le lagi ma le lalolagi, aua e leai se isi e mafai ona toe faaluaina, e **iloga** e oo i le faavavau, ona o le mea na uma

faaauau itulau e sosoo ai

Se Agel u poo se Patel e

Oloo tau sailia e se tama'i nuu i le Setete o Misuri i Amerika, se tagata, e le ona ua ia solia se tulafono, ae iai le taumatega, na ia faia se vavega, ona nimo lea!

Fai mai se alii na vaai iai, "O le mea moni lava, e le taumate na ou vaai i se agelu ua ia faia se galuega lavea'i," o le tala lea a Ieremia Sia o se nusipepa i lea nuu.

O se taavale na aveina e se tagata e ona, na taia ai Keiti Leni i le aso 4 Aokuso, (le masina ua mavae), ma omia ai Keiti, 19 ona tausaga, i totonu o lana taavale. Ua amata ona vaivai le tata o le fatu o Keiti, peiseai ua tau fai atu lona ola, ona

ia talosaga a'e lea i le 'au lavea'i, e tatalo faatasi ma ia.

O le taimi lena na faato'a vaai ai i latou na muamua i le faalavelave, i se tamaloa e foliga mai i se patele, ua tu atu i le mea o tumu ai i le tau faasaoina o Keiti. Na iloa e tagata le amata ona tatalo o le tagata, ma faaoga le suauu lea e masani ona faaoga i malumalu o le Ekalesia Katoliko.

Fai mai nisi na iai, e pei na faamalumalu atu i o latou luga se mamalu uiga ese. Ae le na o lena se mea na matauina e tagata. Fai mai le au lavea'i, o Fuimu, e fai lava ma pepe a latou masini lavea'i a o

le'i taunuu atu le tagata lea. Fai mai lana faatonuga i le 'au lavea'i, ia to'a, e leai se mea o iai e toe lelei a latou masini. E le'i umi ae taunuu atu le isi taavale ma isi masini lelei.

Na manuia taumafaiga ina ia faasaoina Keiti. Ae ua nimo le tagata, ua fiu i su'e, a ua leai se isi se'i avatu iai le faafetai i lana fesoasoani na fai i le faalavelave.

Oloo ua faasolosolo manuia nei Keiti i le falemai oloo taoto ai ona o ona manu'a, e gau'i uma ona vae e lua, ma nisi o ona ivi'aso'aso. Ae fai mai tagata na tumu ane i le faalavelave, o le patele na mafua ai ona ola Keiti. Fai mai i latou, poo se patele ua fai ma agelu mo le faalavelave, poo se agelu mo'i na sau mai le lagi, e le afaina lea. Ae o le manatu o Keiti lava ia, o le agelu moni lava mai le lagi na sau e lavea'i ia.

ABC News 10 Aug. 2013

Lauga Au Taumafai Aso Sa 5 Me 2013

mai le itulau e 11
iai lona soifua paia.

O Asaga o le Tulupae.

Soo se laasaga na laasia e Iesu Keriso, o asaga foi na e solimulivae ai lana Ekalesia. Afai o Iesu o le Tulupae, o le ata foi lena o le Ekalesia - o le Tulupae, o le Ekalesia e tatau ona fai ma *vae ma lima*, o Iesu Keriso i le lalolagi. O le tofi o le Ekalesia, o le faafesoota'i o le tagata ma le Atua, o le lagi ma le lalolagi, o le talalelei foi ma le aganuu.

Ia tausolomua i le Ekalesia ona *lolo'u lona lagi*, i le mea o iai le tagata mativa ma le tagata vaivai, ia manatua, o le ute o le lolo'u o le lagi, o le toese ae le o le faaopoopo. E toese mamalu, toese mea totino, e oo lava i le ola e toese, afai na lolo'u le lagi o Iesu, e tatau foi ona lolo'u le lagi o lana Ekalesia.

Ua fesiligia le Ekalesia i le taimi nei, ona ua 'apo le mataupu silisili o le *tautua*, e taua le tautua o tagata lotu. A ua amata foi ona togo mai ai ma le *ola faaputu* o le Ekalesia. E uso le *ola faaputu* ma le *ola faaopoopo*, o le fua faamatematika, o le tali o le toese o mea, o le *leai o se mea*. O le fua faa-Keriso, o le tali o le toese o mea, o le *faaopoopo* o mea.

O le a le fua o faaoga nei e le Ekalesia? O le fua faamatematika, poo le fua faa-Keriso?

O le uiga lea o le *kenosis* i le mau a Filipi, o le toese o mamalu faale-Atua o Iesu, ma ave ma tagata, ma maliu, o le toe faaopoopo foi lea o ona mamalu faale-Atua.

O papa o Keriso, ma ona manutaeao, e mafai foi ona faalupe Iesu, o le tauluulufausina, ma le tauluulufauula a le Atua, ona o lana galuega.

Ua tatau i le Ekalesia ona laa i fafo, fafo mai ma lona lotoifale faale-lotu, ua tatau ona laa atu

le Ekalesia, i le mea o iai le mativa ma le tuulafoaina. Ua tatau ona matala tapu e aiaia ai le Ekalesia, mai i le laa i fafo atu o lona lotoifale, laa ia fafo atu o o tatou falesa, ia fai le lalolagi ma ona lotoifale.

Ua leva ona malu'ia le Ekalesia, i le ola vavae, ma le papago i ana mea, e oo lava i le mea na oo ia Iesu Keriso, *o le fai ma pologa*, o le ala foi lea e ui ai le Ekalesia.

O le faamoemoe, ia afua atu i totonu o le Ekalesia, le ola o le lalolagi.

Ua tatau ona sui le faamamafa o le galuega a le Ekalesia, mai le *faatalitali tagata*, (reactive), i le *faaola tagata*, (proactive). O le faaola tagata, e le manaomia ai le falana'i ma le talaleu, ae tu ma savali, e ofo le ola mo isi.

E le'i tuvale pe faasega tulauniu, le lupe i le galuega o le leleiga, na saunia e Keriso, aua na ona ususi lava faasii o savili, le maitau a le lalolagi. A o Keriso lava, o le mulitu'i o le laupola, o le faiva o le tai tatau. O ia o le

faaauau itulau e sosoo ai

Na amata faigaluega Iesu i le pisinisi a lona aiga

mai le itulau muamua

Sefulu ma le lua o ona tausaga.

O le aso lona tolu o le malaga toe foi o Iosefa ma Maria i Nasareta, ae fiu i su'e le la tama o Iesu a ua leiloa. Ona su'e ai lea o Iesu. E leai lava se manatu o matua o Iesu o le a alu le la tama i le malumalu, ae o le mea muamua lava lena na alu iai Iesu ina ua ia tuua ona matua i le ala aga'i i Nasareta. E maua ane e Iosefa ma Maria ia Iesu, a ua tele itula o niniva ai ulu o le 'au popoto i mataupu tau le lotu ma le lalolagi, i tali o a latou fesili na fai ia Iesu. Na o le 12 tausaga o Iesu ae ia lagona le valaau a le Atua ia te ia. A o le a lana tali iai? Na ia tali i le sailia lea o ni

ona soo? Leai. Na ia tali i le lauga lea i tagata e uiga i le Malo o le Atua? Leai. Ua fo'i o ia i lona aiga ma faigaluega i le pisinisi a lona aiga ma a'oa'o le faakamuta. Na matua galue ai Iesu i le latou pisinisi, ma fesoasoani i ona matua, mai le 12 o ona tausaga seia oo ina 30 o ona tausaga.

O le mea foi lea e tataua ona amata ai 'oe le tama ma le teine talavou. O le faigaluega e fesoasoani i ou matua ma lou aiga, mai taimi o lou tamaitiiti, seia oo lava ina e tagata talavou matua. A o e le'i faia ni mea tetele mo le Atua, amata ona e fesoasoani i ou matua ma lou aiga i aso taitasi. Fesoasoani e fai lelei le pisinisi a lou tou aiga.

Fesoasoani i le faiga o le faato'aga a le tou aiga. Fesoasoani i le faiga o fe'au a le tou aiga i aso taitasi.

E le taumate o le a e fai mai, "Ou te fia alu i Malua ou te a'oga ai faafaifeau ma ou alu ai e faamisionare. Lelei. Ae ia muamua lava ona e galue i ou ulua'i tausaga mo ou matua, ma lou aiga. O ina e te amata mai ai ona e koleni mo ni galuega tetele o le a feagai ma oe i lou olaga pe a oo ina e tagata matua. O le to'aga e galue lelei ma le faamaoni e amata atu i lou aiga, i lou faamaoni i ou matua, ma usitai i ou matua, ma fai lelei fe'au ua faatonuina ai oe e ou matua. Fai mai le Salamo 101 f. 2: "Ou te savali a'u ma le lotu sao i totonu o lo'u fale."

Na manatua e tuaoi o le 'au Iosefa o Iesu o se tama galue. "E le o le tufuga ea lenei, le tama a Maria?"

Le tupulaga o tama ma teine, ia manatua oe e ou tuaoi ma lou nuu, o oe o se tagata sa fesoasoani ma le faamaoni i ou matua a o e talavou, a o le'i avea oe ma tagata matua.

Lauga Au Taumafai Aso Sa 5 Me 2013

kuluma e momoe iai au o le sasaga, pe afai e tapula le lagimalofie, e ala i tiga o loo feagai ma lana Ekalesia.

Le tulupae auro o lona lotoifale i le lagi, ma lana tu'itu'i tatau, ua tatala mo oe ma a'u, le tagata ua to'ilalo popo ona o le agasala.

O le 'AUAUFANUA o Keriso, ua tatou lelei ai ma le Atua.

('AUAUFANUA - o le toto masaa.) O nai motuga'afa o le leleiga na saunia e Keriso.

O le satauro mataga, ma le tuugamau taaligoligoa, ae na fai ma to'ala faa'autama, o lo tatou faaolaina faale-agagai.

Faafetai tele le Atua, ua e pupuni le oloniu ma le fa, le

galuega tele ua mae'a, ua uma foi ona umusa.

Le 'ie o le leleiga, ua folasia nei i le tatou va, le fealofani ma le lotu faamagalalo, o le ki atoa lena, e matala ai soo se faitoto'a, ma soo se faigata.

Ua suatia e Keriso le u ma le 'au matatao, ina ia aua ne'i motusia lona alofa, e pei o le vivini a le faailoao. A o le faaolataga e pei o le matagi e agi i matagi'olo, ua to'ilalo popo ai le fili ma le tiapolo. Ua tatou la'ei ai nei i le mamalu, ma pale i le matagofie, e pei o le toe aso nai Moamoa, na me'eme'e ai le tama o Leatiogie.

Oloo tatou malaga i le vaa e le toe foi mai, e le pei o le Puleono, e malaga mai i Mulifanua, ae toe faamoemoe mo Salafai.

O lau filifiliga, ma lau faai'uga, ia sa'o ona lelei ona fai, aua a iu

lenei ola, ona ifo lea o le tagauli o le vaaloo, ma gase i pa'au le i'a a le tautai.

O le faamoemoe maualuga le Ekalesia, ia faamalieina lava lo tatou Matai, o ia lava sa foemua, ma faatamasoalii ma tautai.

Manatua soo se tuuga vaa, o apefoe faaoso lava e amata ai, ona sosoo lea ma apefoe taotao, poo apefoe tata'i, e to va ai. Afai ae filivaa le tuuga, o apefoe gaoi e faaaoga ai, a o le apefoe oti, poo apefoe faatini, e faai'u iai.

Oloo faatali mai lo tatou Alii i le tini, poo afea e te taunuu atu ai. Na te fusi oe ma sapai, aua ua ta'uaogaina lou soifua tautua, o le mafuaaga tonu lena na maliu ai. O si ana tuumumusu, amuia lava lea auauna, e maua mai e lona matai, oloo faapea ona fai.

O le Ulugalii e 72 tausaga o nonofo, e na o le tasi le itula e va ai lo la maliliu

O Gordon Yeager, e 94 ona tausaga, ma lona faletua o Norma, e 90 ona tausaga, e maliliu ane i le falema'i, o 'u'ulima lava. Na muamua ona maliu ia Norma, ae tasi le itula talu ona maliu o ia, ae maliu lona to'alua o Gordon. A o 'u'ulima lava!

E 72 tausaga o nonofo talu mai ona faaipoipo i le tausaga e 1939, i le aso lava na i'u mai ai Norma i le High School. O le itula e 10 i le taeao na i'u mai ai Norma mai lana a'oga, a o le

itula e 10 i le po o lea lava aso, na faaipoipo ai.

Fai mai le tala a le la fanau, o o latou matua, e fai faatasi lava a la galuega uma. E oo foi ina ua faigaluega i kamupani, e faigaluega faatasi lava i lo la olaga atoa.

Na tuua e Gordon ma Norma lo la fale i lo la tama'i nuu o State Center i Iowa e o i le aai e faatau, ae peitai e le'i oo iai ae tupu se faalavelave. Na lavea le taavale ma manunu'a ai le ulugalii, gaugau ponaivi o o la tino, ma

isi manu'a.

Ae oo atu i le falemai, e le popole Gordon i ona tigaina, ae tuu fesili poo faapefea mai Norma. O Norma foi ia, e le popole foi i ona manu'anu'a, ae tuu fesili foi pe o a mai lona to'alua o Gordon.

Ina ua iloa e foma'i e le i'u i se manuia le ulugalii, ona tuufaatasi ai lea o la'ua i le potu e tasi. Ua faapipii faatasi o la moega. Ona ta'o'oto ai lava lea, e 'u'u e Gordon le lima agavale o Norma i lona lima taumatau.

Fai mai le la tama o Dennis Yeager, ua faanoanoa lava ina ua alu atu i le fale o o latou matua, o tuu mai ai nofoa e lua e tutu faatasi. O ina e masani lava ona nonofo ai o latou matua ma talatalanoa, ma matamata i le televise.

Na latou pepese i viiga o le Atua

E le taumateina lava le faafia ona tatou faitauina le Tusi Paia, ae o tatou manatunatu loloto iai i mea o tatou faitauina, ma lo latou uiga, se aoga mo tatou, ma tatou vivii ai foi i le Atua ona o a'oa'oga tatou te maua mai lana Afioga?

E iai se tala i se faalapotopotoga a ni tama'ita'i sa fai i aso la anamua anamua lava, i le malo o Roma, latou te potopoto ai ma faitauina le Tusi Paia, ma suesue iai, ma sailiili i lona uiga, ma se aoga foi mo latou.

O le tausaga e 380, poo le tusa lea o le faato'a 380 tausaga o le Ekalesia Kerisiano. O luga o le Mauga o Avenitine, sa faatasitasi iai nei fafine i le maota matua manaia lava o le tamaitai o Masela, o se tina talavou ua oti lana tane, ae matua mauoloa lava. Sa latou matua su'esu'e le Tusi Paia, ma tauloto nisi o fuaiupu ma mataupu e faaogaina i lo latou ola i aso taitasi. Na mananao foi i latou latou te pepeseina Salamo i le

gagana na tusia ai, ona latou aoaoina ai lea o le faa-Eperu. O aso uma lava latou te pepese ai i Salamo, ma a'o tauloto upu.

O se tasi o nei tamaitai o Paula, o se tina e tupuga mai i tupu o le itumalo o Sparta i Eleni. E maliu lenei tamaitai i le tausaga e 404, faato'a maea lava ona ia taulotoina le Salamo e 26 f.8 i le gagana Eleni na tusia ai: "Le Alii e, ou te fiafia i le mea e tu ai lou maota, o le mea foi e afio ai lou mamalu."

O aso e tolu na sosoo ma le

mai le itulau muamua

Fetalai le Atua, na te le manatua

o ita ia te oe. Pe e te mana'o foi ina ia e faamagaloina se isi.

E iai tagata e peiseai e nonofo i se falepuipui o le loto ita ma le fia tau ma sui, ma aafia ai lava lo latou ola, a latou amio, o latou uiga, i le va ma isi tagata. E 'o'ona lava o latou lagona, ma faigata ai ona latou

maliu o Paula, na potopoto ai nei tina Kerisiano, ma fai ni a latou pesepesega i Salamo, i gagana e fa na latou a'oa'oina - Eleni, Eperu, Latina ma le faa-Suria, e fai ma faamanatu i le soifua o se tasi o i latou ua maliu, o Paula.

E le taumate lava na mulimuli nei tamaitai i se faaa'oa'o na tuu e Tavita i le fuaiupu e 6-7: "Ou te fafano o'u lima e fai ma faailoga ua ou le sala; ona ou faaamilomilo ai lea i lou fata faitaulaga, le Alii e; ina ia lagona atu le leo o le viiga, ma ia ta'uta'u atu ou vavega uma lava."

faamagaloina se isi.

E iai se talatuu i se tama'i nuu i le atunuu o Amerika e faapea o se faifeau na pologa lava i ona manatu ona fai mai a ia na ia faia se agasala matuia a o talavou o ia. E ui lava ua uma ona ia tatalo i le Atua ina ia alofa ma faamagaloina o ia, ae tumau pea lona manatua o lana agasala na fai, ma fai ma mea e aafia ai lana galuega. Ona, e le mautinoa e le alii faifeau pe ua faamagaloina

faaa'ua'ua itulau e sosoo ai

Fetalai le Atua, na te le manatua!

faaauau mai le itulau muamua moni o ia e le Atua.

O se isi aso na fai atu ai se isi ia te ia, e iai se loomatua i lana aulotu, e masani ona ia iloa faaaliga mai le Atua. I ia faaaliga, e talatalanoa ai le loomatua ma le Alii. Ona manatu ai lea o le alii faifeau, o le a alu i le loomatua e fesili iai.

Na talia ma le faaaloalo le alii faifeau e le loomatua o lana aulotu, ma ia liligi ane se iputi ma ia, ma lana foi iputi, ona la talatalanoa ai lea. Na tuu i lalo le iputi a le faifeau ae vaai toto'a atu i le loomatua, ae pulatoto'a mai foi iai le loomatua, ma inu lana ti.

"E moni e iai nisi aso e te maua ai ni faaaliga mai le Alii."

O le fesili lea a le faifeau.

"I." O le tali lea a le loomatua.

"E moni, o ia faaaliga, e lua te talatalanoa ai ma le Alii?"

"I." O le tali lea a le loomatua.

"Ia, a lua toe talanoa ma le Alii, e mafai ona e fesili atu iai i le mea lea ou te manao iai?"

Ua vaai toto'a atu nei le loomatua i le faifeau. Ua ia mafaufau ifo, e le'i fai atu lava e se isi sona manao faapea ia ia.

"Ia ua lelei, ou te matua fialia lava e fesili i le Alii mo oe. O le a le mea e te manao ou te fesili ai i le Alii pe a toe faaali mai?"

"E mafai ona e fesili iai i le Alii, poo le a le agasala matuia na faia e lau faifeau a o laitiiti?"

"Ia, ua lelei. O le a ou fesili iai. E le taumate lava le aumai e le Atua se tali lelei mo oe."

Ua tau oso a'e ni masalosologa i le mafaufau o le loomatua i lana faifeau, poo a ni agasala matuia na ia faia a o

talavou.

Ua te'a ni nai vaiaso, ona toe asiasi lea o le faifeau i le loomatua o lana aulotu.

Ua fesili le faifeau i le loomatua, "Na toe iai nisi faaaliga na e maua i ia vaiaso ua te'a?"

:"O! loe! na toe oo mai foi le faaaliga ia te au."

"Na lua talanoa ma le Atua?"

"I."

"Na e fesili iai pe o le a le agasala matuia na ou faia a o o'u talavou?"

"I."

Ua tau le manifo le faifeau. Ua manatu ifo foi, ua ta'u moni lava e le Atua i le loomatua lana agasala na fai a o talavou.

"O le a la le tali a le Atua?" O le fesili lea a le faifeau.

Na toe vaavaai toto'a atu le loomatua i mata o lana faifeau, ma tautala atu lemu iai, "Na fai mai le Atua, na te le manatua."

"O a'u fanau ua foaiina mai e le Atua i lona alofa i lau auauna" (Kenese 33 f.5)

E faigofie lava ona e faitio ona o le tele o ni mea e te le o maua, a oloo maua e isi tagata; ae galo ai ia te oe le anoano o isi mea oloo ia te oe, ae te le o ano iai, pe e te manatu mama iai, a o ia mea oloo faaleleia lou ola, ma e maua ai le manuia. Atonu e mafai e le tala lenei mai ia Semisi Topusone ona suia lou manatu:

Fai mai Topusone, o se aso ua levaleva atu, na otegia ai e se alii la te masani, o se uo foi ia te ia, lona afafine laitiiti, ona o lona faamaumauina o se ta'aiga pepa 'i'ila e affi ai mea. Ua 'uti'uti lava le itu tau tupe a le aiga, ma ua maitaita ai Semisi i lea vai taimi, ona ua sasae e lona afafine le taaiga pepa lea, ma affi ai se pusa ma tuu i lalo o le laau Kerisimasi.

O le taeao na sosoo ai, o le

Kerisimasi, na avatu ai e le teineitiiti le pusa lea o lana meaalofo i lona tama, ma fai atu iai ma le fialia, "Papa, o la'u meaalofo lea mo oe!"

Ua toe faanoanoa le tama ona o lona uluai ita na sasao i lona afafine lea ua sau ma lana meaalofo oloo affi i le pepa 'i'ila. Ae na toe oso i luga le fiva o le ita o le tama ina ua susu'e atu le pusa, e leai se mea o iai.

"E te le iloa a e avatu se meaalofo i se isi, e tatau ona iai i totonu o lau affi le meaalofo?" O le 'e'e leo tele lea a lenei tama, pei lava o ote i se tagata matua..

Ua tagi le teineitiiti, masusu, ma vaai atu i lona tama ma le fefe, ma fai atu, "Papa, o lona iai i totonu la'u meaalofo! Na feula iai i totonu a'u kisi e tele, e faaali ai lo'u alofa mo oe Papa, ona affi ai lea i le pepa 'i'ila!

Papa, manuia le Kerisimasi."

Mafaufauga o le teineitiiti, faatamaiti, ae le'i mate'ia e le tagata matua. E le'i mate'ia e lona tama.

Ua te'i le tamaloa i le tala a lona afafine. Ua ia lagona lona sese, ma ua oso a'e i luga lona alofa i lona afafine. Ua tago atu nei ua fusi mai lona afafine ma opoopo mai i ona lima lapopo'a, ma fai atu iai i lona afafine e alofa ma faamagalalo mai ia.

Fai mai Topusone na faamatala e lana uo le mea lea, ma faaali ane ia te ia e faapea, e tagata matua lava lona afafine ma fai lona to'alua ma le fanau, o le la lava na te tausua le pusa lea o tumu i kisi na feula iai e lona afafine, e faamanatu ai pea le mea na fai e lona afafine mo ia a o laitiiti.

O tatou uma matua, e tele mea e fai e a tatou fanau e faaali ai lo latou alofa ia i tatou, ae tatou te le mate'ia. Ia tatou mataala ma vave ona tatou iloa atigipusa o tumu i le alofa o a tatou fanau mo tatou.

O LE LAUGA

Lauga o le Aso Sa o le Tala Lelei

Pulega Faleata Sasa'e

.....

Matua: 2 Samuelu 7: vaega fuaiupu e 5 ma le 6:

".....O loo faapea ona fai mai o le Alii, e te faia ea e oe se fale mo a'u ou te nofo ai? Aua ou te le'i nofo i se fale talu mai le aso na ou aveina a'e ai le fanauga a Isaraelu nai Aikupito...."

O le Ta'iala o manatu oloo 'au'au iai faitauga Tusi Paia a le Au Kerisiano i lenei vaiaso:

E le o i luga o lenei mauga poo i Ierusalem. O lona faa-Peretania: **'Neither on this mountain, nor in Jerusalem!**

A o le autu o mafaufauga faale-agaga i lenei Aso Sa:

Le faatapulaaina - No Limits.

FOLASAGA

* Le Faatapulaaina! O lona uiga e leai se mea e gata mai ai. E talanoa i le tele o le sa'olotoga e aunoa ma ni ona pa puipui.

* A to manatu i se mea ua Faatapulaaina, e vave ona fesootai le mafaufau i ni aga poo ni faiga ua fuapau. Ua tosi le laina e gata ai, pe seti foi se pa e faamuta ai ona ulufafo atu ma ulufale mai.

* O le ata manino lava lea ua faafalepuipuiina se saolotoga i totonu o se avanoa pumoomoo, e le mafai ai ona toe laasia nisi sitepu o i luma atu.

* E noatia mea uma ona ua aiaina i le tapulaa ua faia.

* Peitai a le faatapulaaina se mea, o le mea moni ua tatala noataga ia. Ua matala mai faitotoa e saoloto ai.

* E le toe tau sailia ai ni avanoa e galue ma saili ai, mo le lelei ma le tulaga manuia o se faamoemoe.

* O MAUGA o nofoaga e masani ona saili i ai e le Nuutofi o Isaraelu so latou fesoasoani. Lea e fai ma pese tauave a le fai Salamo: "E faasaga a'e o'u mata i mauga, e oo mai ai lo'u fesoasoani. O lo'u Fesoasoani e mai le Alii lea...."

* E tata'i iai o latou fili i luga o le mauga, ona ua manatu e tauto'alua ai lo latou Fesoasoani ma i latou.

* E tuu le Atua i le mauga aua o le mea maualuga, e iloa ai le Silisiliese o lo latou Atua. E afio ia i le tumutumu mauga, aua o le Atua e paia ma maualuga! Talitonuga faa-Feagaiga Tuai o Isaraelu.

* Pau lava o lea, e iai foi le itu na iloa ai le vaivai o lea talitonuga, aua ua foliga mai e muta le auai o le Atua i mea maualuluga, e maua le Fesoasoani i mauga, ae faapefea mea o iai vanu ma tofe o le olaga? Ua pei o se Atua e faailoga ni nofoaga e maua iai i le manatu o tagata.

* Ui lava o se faiga oloo faamatala ai le tulagaese o le Atua o Isaraelu i le va ma Nuu Ese, peitai ua le fesootai ai ma le Mataupu Silisili - O le Atua e Afio i mea uma.

* 'Ia 'ai o le tulaga vaivai lea na fau ai e le nuutofi le povi auro i auvae o le Mauga, a o alu Mose i le tumutumu e aumai le papamaatusi o tulafono. E le iloa pe na faapea nisi, tatou tapuai i le tupua lea e le o iloa mai lava e lo tatou Atua! *"Isaraelu, aua e te fai mo oe se tupua ua ta, poo se faatusa...."*

* E sau Mose ma le papamaa ua uma ona lolomi mai ai upu ia. O lea sa iai le Atua i auvae o le mauga.

FEAGAIGA TUAI

(2 Samuelu 7:4-7; 11-16)

* Sa lima ta'ita'iina ai foi le

olaga o le Tupu o Tavita i le talitonuga lea faa-Isaraelu.

* Ua ia seei mai i le nofoalii ma lona agaga sa'ilimalo mo le nuu, aemaise o lona tausisia o ona talitonuga i le Atua.

* Fai mai le faamatalaga a le tusitala a o nofonofa Tavita i lona maota, na tupu a'e se lagona maoluma ia te ia, ina ua vaai atu i le Atolaau a le Atua oloo taoto i le fale'ie, peitai le tupu oloo afio i le Fale Arasi. Peiseai ua maoa'e lona maota, ae faatauva le mea ua fai ma afioaga o le Atua.

* O le uiga lea o ana upu i le perofeta o Natano: *"Faauta mai ea, ou te nofo a'u i le Fale Arasi, a o le Atolaau a le Atua, ua iai i totonu o le 'ie puipui...."* Afai o lona valaauina e mai le Atua, faafoi la le mea sili i le Atua.

* E maualuga le vaai a le tupu i lona Atua. Ua le manatu ai e tuu le mamalu o le Alii i se mea faatauva. **O se lagona e 100% i le tatou vaai.** Afai o lona valaauina e mai le Atua, faafoi la le mea sili i le Atua.

* E mamao le tofa a le tupu, ae silisili ona mamao le silafaga a le Atua i le mea ua ia finagalo iai. E atamai si alii o Tavita ma lana faatofala'iga i le perofeta, ae sili atu ona maualuga le poto o le Atua.

* Se'i faauta foi la i lana fetalaiga: *"E te faia ea e oe se fale mo a'u ou te nofo ai? Aua ou te lei nofo i se fale talu mai le aso na ou aveina a'e ai le fanauga a Isaraelu mai Aikupito, e oo i lenei lava aso."*

* O si lape o le talitonuga o Isaraelu, o lea foi e aafia faaleiloga atu ai ma manatu o le tupu. E taua lana faamanatu ia Natano, a o le faalavelave ua laaloa lana silasila i le natura auai o le Atua ua talitonu iai. Ua le o le Atua o se Atolaau, ua na o se faailoga! E le faatapulaaina ua na o se fale'ie, ma se mauga,

faaauau itulau e sosoo ai

O LE LAUGA

ma se malumalu, e maua iai le Agaga o le Alii. E le ofi le Atua lea, i se fale e faia e lima. Ua le afio foi o ia i se mea e tasi, aua e malaga ma galue i le olaga o le tagata. Sa iai ia Isaraelu i lana malaga i le vao. Na auai foi ia Tavita a o avea ma auauna i lona tama. Lea lava e galue pea le Atua lea, e le o muta lona auai mai i le tagata.

* O lona uiga o se feau taua o lenei mataupu, e le faatapulaaina i le fale, poo se tagata, poo se taimi le fesootaiga a le Atua, i mea na ia faia e aofia ai ma tatou. Aua afai e saili ua na o lona maota, e gata ai foi iina le fesootaiga a le tagata. Ae a mautinoa i le mana auai o le Atua i mea uma, e le uma le ola fia fesootai, e le gata foi le taumafai saili i la le faatuatua i le Atua.

FEAGAIGA FOU

(1 Korinito 3: 5-23)

* O le faapogai lea na manu a'e ai i Korinito se upu ua faaleaoga upu. O Korinito o le Ekalesia ua femisaa'i. Aua ua toso e nisi o latou lava faasinomaga. O Paulo isi, o nisi o Apolo, o nisi foi o Sa Kefa.

* Vaivaiga ua le toe vaia le malumalu i Ierusalem sa fai ma faasinoala o le ola tapuai. Aisea? O lea ua tuvae le Tala Lelei i eleele o nuu ese. O le vaivaiga e afua ai le feeseesea'iga ua tulai mai ia Korinito, ona ua manatu tagata i le 'Au Tala'i ae ua le o le Atua. Ua faavasega tagata i le fale o le Atua, a ua le vaai i le faamoemoe o le Tala Lelei. Ua mamafi i le tala lotu ma taofiofi mamau i o latou talitonuga. Ua pei o se fua ua toso e faatapulaa ai le saolotoga o Nuu Ese, mai le fesootai atu i Kerisiano lutaia.

* A o le uiga lea o se taofi vaivai, i le manatu faa-Tavita lea

e gata i le Atolaau, e gata i le fale'ie poo le malumalu foi le fesootaiga ma le Atua. Aua afai o lena se faamoemoe, e uma loa le falesa gata foi le ola paia o le Kerisiano. O le ata lena o se mafaufauga e faatapulaa le sootaga lelei ma le Alii. Ae a tausisi Kerisiano i le mau a le aposetolo i Nuu Ese, e savali le Tala Lelei ma alu pea, aua oloo galue ai le Atua i lou finagalo ma lo'u loto e avea ma malumalu paia. *"Tou te le o iloa ea, o le malumalu outou o le Atua, oloo nofo foi le Agaga o le Atua i totonu ia te outou.?"*

* E manino lelei Paulo i le ma'i o le Ekalesia i Korinito. E mafua i le ola fai tuaoi o Kerisiano lutaia, o e na fanau mai ai Folafolaga o Manuia mo le lalolagi. A o manuia e sa'oloto i ai tagata uma ina ia maua ma talia, e mai le Atua e le faatua'oa lona alofa, ma e leai foi se mea e gata mai ai lona faamaoni.

FEAU/FAATATAU

* Le Ekalesia e, ua atoa nei le 183 tausaga talu ona iai le Tala Lelei i lafanua sa pouliuli o Samoa. Ae o le mea mautinoa foi, e le'i gata ai iinei le malaga a le Tala Lelei ma lona malamalama oloo susulu atu pea e pei o ni ave lautetele o le La o le Atua i le fogaeleele. Na o mai misionare ma tala'i mai ma o, ma oloo alu pea le Tala Lelei a le Atua e oo mai i le aso. Le uiga lea o se feau.

* **Pe ana tutusa le finagalo o le Atua ma le manatu o le tupu o Tavita, ailoga e sa'oloto tagata e tapua'i aua e a'ea'e e tuli le mea maua luga? E faatalitali seia aulia le Aso Sapati, ona faato'a maua lea o se fesootaiga ma le Atua i lona malumalu. Ana faapea foi e le auai le Atua, ae nofoa'i pea Paulo e aunoa ma le fofoina o le faafitauli o ulua'i Ekalesia, ailoga i se a na iai se loane Viliamu, a o anafea foi na iai se Taeao o le Tala Lelei?**

* A o ia mea uma, oloo aliali manino ai lava le Atua Auai oloo afio pea ma galue i le mea oloo agai iai lana Tala Lelei. O iina foi oloo faaalai ai lona mamalu i tagata

uma ma fale uma, e oo lava i o tatou fale faale-agaga.

* Ta'ilo i sa outou faafofoga ae ua masani la'u faalogo i lea foi upu - **E leai se tuaoi o mea lelei! O se taofiga e faaola totoga i le soifua ma le ola tautua aulotu.**

* Ou te iloa e nanamu atili lou soifua ma lo'u ola fai taulaga pe a faatino mo le Atua, ae taoama ia viiga o le tagata. Ae 'aua foi nei galo, e faia lava le soifua galulue ma le ola auauna, ae faalologo i le faasinoga a lo tatou Matai Sili. O le fua faale-Atua lea e nanea ai mea tatou te fai, aua ua faatino i le loto malie ma le ola fiafia.

* O le matagofie o mea e le faatapulaaina ona fai, aua e faimalaga ma galulue faatasi le Alii ma ona tagata faatuatua. O mea e faia i auaunaga saoloto, ina ua inu malie i le alofa o le Atua.

* E faamalo i le Ekalesia ma lona maau foai mo le Alii e ala i le Taulaga mo Nuu Ese i lenei foi tausaga 2013. Faafetai le faapolopolo, malo tautua Tala Lelei! O lea ua tatou sao mai le Amouta, ae tali le Amotai aua le lomaloma o a ta feau faaii o lenei tausaga.

* Le fanau a le Atua, e le uma pea feau, e leai foi se laina e muta ai fuafuaga mamana a lo tatou Alii, i le taitaiga o le ta malaga faalefaatuatua, i mea e manuia ai fanau, o aiga, o nuu ma le atunuu e oo lava i lana Ekalesia. O le manuia lava lea e aveavea'i pea, mo le Galuega Faa-Mlisionare oloo faa-Tala Leleiina le lalolagi atoa.

KERYGMA:

* Le auuso e ia Keriso, ua leai lava se pa puipui o le alofa saili mai o le Atua mo lana fanau i le lalolagi. E le'i faatapulaaina foi ona saunia lenei faaolataga mo na o se vaega o tagata, e leai! O le alofa na ofo atoatoa mai ina ia saoloto tagata uma e talia ma ola ai i le malu o lana faaolataga. O le alofa e o'oo'o i soo se tulimanu o le olaga o le tagata, o e ua faamoemoe ma le mautinoa e toe mafuta faatasi ma ia i lona toe afio mai. AMENE.

Saunia e

Rev. Kirisimasi Sani FS,

Ululoloa, Faleata.

(E sui ai le Lauga o le Sulu o Setema na tofia ae lei oo mai)

O E UA MALILIU

Neemia Faatumua

6 Mati 1931 - 25 Iulai 2013

Le Afioga i le tiakono - "Neemia Faatumua". O lona soifua o le aso 6 Mati 1930, ae faamanavaina e lona Matai ana feau i le aso 25 Iulai 2013. Ua 83 tausaga o le soifua o le tama ia Neemia. O lona tama o Faatumua, o lona tina o Kafutu mai le motu o Nukufetau i Tuvalu.

Na malaga mai Neemia mai Tuvalu ma nofo i le nuu o Afega i le tausaga e 1951. Na faaiipoipo atu ia Sesa ma faaee ai lo la tofi tiakono i le 1960 i le EFKS i Afega lava. O le tausaga 1984, na o mai ai ma nonofo i lo latou aiga i Elisefou. E toalima o la alo. O le aofai o fanau a fanau e toa luasefulu ma le fitu, a o fanau a fanau a lana fanau e 23. Lona uiga e maliu Neemia ua 55 le aofai o e na tutupu mai ia te ia.

O le aso 27 Aperila 1986, na aloaia ai lo la tofi tiakono i totonu o Elisefou. Na maliu le tina ia Sesa i le tausaga e 2008, ona faaauau ai lava lea e le tama ma le fanau lo latou matafale.

O Neemia e tusa ma molimau a le Susuga i le Faafeagaiga ia lakina Alefaio, o le sui o le aiga, o ia o se tama e alofa, e tumu i le faaaloalo, e faifai malie, e toaga i le lotu, e le tamaoiga lona olaga, ae loto foai mo le Atua ma lana galuega.

Na saunoa le Tofa Taefu Salapu Asalele, o le Aoao Fesoasoani, a o le sui o le Ekalesia i lana molimau, sa ia faatusa le tama ia Neemia, o ia o le olive, e sasala lona manogi, e taua le laau lea e fai ai uu manogi. E iai le taleni "fofo" taulasea ia Neemia, e le o se tagata e faalogologo tiga, e agamalu, e faatupu filemu, ae e ola tauivi.

O le faletua ia Sapini Eteuati Pasia, le tina penisione malolo, o ia foi sa mafuta ma le tama ia Neemia i le tele o tausaga, a o galulue ai ma le Susuga i le Toeaina Faatonu ua lagomau mai tiasa, ia Eteuati Pasia i Elisefou nei, na ia saunoa ai e faamaoni le

Leniu Tofaeono

Avamagalo

4 Iulai 1927 - 15 Me 2013

Na soifua mai le tama i le aso 4 Iulai 1927 ae na tuua le malo ma faamanavaina e le Atua ana feau sa tautua ai i le aiga, nuu, malo ma le atunuu aemaise lana Ekalesia pele i le aso 15 Me 2013.

O ona toe sauniga sa faia lava i le malumalu o lana Ekalesia EFKS i Laulii i le aso 27 Me 2013.

Sa faatumulia le malumalu i le loaloa o e na afiio ma tala'a'ao mai e molimau i le aso o le tama, le Ao o le Malo Afioga Tui Atua T.T. Efi, le Sui o le Fono a Sui Tofia, Afioga Tuiaana Tuimalealiifano Vaaletoa, Afioga i le Palemia Susuga Tuilaepa L.S. Malielegaoi, Afioga i Minisita o le Kapeneta, le Fofoga o le Fono ma Sui o le Palemene o le Malo Tutoatasi o Samoa, le Afioga i le Faamasino Sili, o malo mai fafo, o sui o le malo Amerika e

tele o molima ua uma ona folasia e uiga i le tama lea.

O Neemia o se tama galue malosi, tele foi tausaga sa tofia e fai ma usufono, e galue faamaoi. Sa avea ma peresetene, taitai o le autalavou, o se sui o le afaipese, a o se faiaoga Aso Sa foi. O se tama e atamai i le Tusi Paia e pei ona saunoa ai le tina malolo, ona o ia o se tagata Tuvalu, na sau e alu i le A'oga Faafaifeau i Malua, peitai ua faaoga lona soifua i fanau o le Ekalesia, e ala i lana Aoga Aso Sa.

O foliga ma uiga vaaia ia o lenei tama, ina ua ma taunuu mai foi ma galulue ai i le Ekalesia nei, o lea ua atoa le uluai tausaga o la matou mafutaga. E ui lava ina ua taunuu mai ua matua le soifua galue o lenei auauna, ae ua lava a molimau i lona soifua tautua, faatasi ai ma matou feiloaiga i a'u asiasiga, e viia ai le Atua ona o lenei auauna. E leai sona tamaoiga i mea o le tino nei, ae talitonu lona loto i ana faatinoga ma sana auaunaga i lana Ekalesia, e foai e le Atua mea silisili mo ia ma

amanaia ai lana tautua i lea malo i tausaga e tele, o fanau ma aiga, uo ma aumea mamae.

E uiga ese lava foi le mamalu o maliu faapenei, o tumutumuga o nuu, aemaise lava foi i le galuega a faleupolu tausii tupaau e pei ona faaalua i lea aso e Tuisamau ma Ituala aemaise o le lagolago a Laauli ma le aumaga. E le gata i le tauaaoina o le sa o le tama, ae o le leoina o le maota i Fusi ma Fanuatanu sa taoto ai i le po a o lumanai ai ona toe sauniga. Aemaise ai foi o le galuega a malu o le malo Samoa i le faaaloalo maualuga faale-malo e amanaia ai lana tautua i tausaga e tele i le Malo Tutoatasi o Samoa o se faipule, o se minisita.

O au lava sa taitai ae o le faifeau tausii aiga ia Kolia Matamu na faaulufaleina le sa o le tama i le falesa. O le tina ia Serafina Leniu na molimau i le la mafutaga ma le tama, o se tagata aga malie, ae o se tama e alofa faamaoni i lana fanau ma lona aiga aemaise o lona nuu. Ae o lana tautua foi i le *faaauau itulau e sosoo ai*

le fanau.

Na aveese mai le tino maliu o Neemia mai le maota maliu o le falemai i Motootua i le taeao o le Aso Lua, 6 Aokuso, 2013, i le 7am ma molimoli mai i lona aiga i Elisefou, ma mapu ai seia oo i le 10am o le taimi o ona toe sauniga i le malumalu.

Sa ou taitai i le toe sauniga, na ou faaulufaleina le tino maliu, o le Tusi Paia na faitauina e Taefu Salapu Asalele (Aoao Fesoasoani), o talosaga na saunia e Ulugia Mata'u Matafeo (Aoao Fesoasoani, ma le lauga na saunia e Seve Sinei Fili (Aoao Fesoasoani), ona faaopoopo lea o le taitai.

Sa ou taitai i sauniga i luga o le tuugamau, ma faatofa atu ia Neemia i le lagiina o le pese: "Talofa uso e tofaina oe."

Faafetai i le Atua ona o le soifua galue o lana auauna o Neemia. Ia manuia lau malaga Neemia.

Rev. Reupena S. Nofoaiga (ATN)
EFKS Elisefou

O E UA MALILIU

Leniu Tofaeono Avamagalo

Ekalesia e uiga ese lava foi lea, aua na taulamua i le galuega o le falesa o le Ekalesia ma le Matagaluega Metotisi sa lolotu ai a o aumau i Amerika, ae ina ua taunuu mai foi ma nonofo i Samoa o le lotu lava le taualuga o lana tautua ma le auunaga. O ia o le taitaifono i le aulotu EFKS i Laulii e oo mai ina ua valaau iai le Atua. O le Afioga i le Tiakono ia Toloa Topele Leniu na molimau e fai ma sui o le fanau, o se tama sau, ae sa sau i lona alofa ina ia manuia lana fanau. O lea lava foi le molimau a le tina ia Gese ma le tina ia Sefululima sa fai ma sui o lona aiga, o se tama alofa i lona aiga, o se tama fai aiga lelei, sa maopoopo ai lava foi lona aiga.

O le alo o le sa'o ia Fuamatu Asueru sa molimau e fai ma sui o le nuu, o lana lava foi lea molimau, o le tama tausi mamalu, aemaise o lona naunau ia maopoopo ma siitia maualuga le soifua faaleagga o le nuu i le faamaopoopoina o lotu tuufaatasi e lua i le tausaga e manatua ai le alofa o le Atua ma mea na tutupu i le nuu i auga tama ua mavae. O lea lava foi le molimau a le Toeaina ia Patolo

Matalasi, o le taitai o le afaigaluega faifeau i totonu o lenei nuu, o se tama e tumu i le tamalii ma le faaaloalo i le afaigaluega a le Atua. O se tama tausi faifeau ma e na te le faailogaina lava se Ekalesia, ae tutusa uma lava ia te ia faifeau e fitu o Ekalesia e fitu i totonu o lona nuu.

O le Afioga i le Palemia le Susuga Tuilaepa L.S. Malielegaoi sa fofogaina le molimau a le malo, ae o fai ai ma faipule o le Itumalo Vaimauga i Sasae, ma minisita o le Matagaluega o Tina ma Tamaitai. Sa le faigofe lava ia taimi aua o taimi o solo tetee, ae sa galue pea lava le tama ma le faamaoni ma le faalogologotiga.

O le Taitaifono o le Komiti a le Au Toeaina, le tama Faatonu ia Peleti To'ailoa sa molimau e fai ma sui o lupe faalele a lenei Ekalesia, ma saunia le upu faamafanafana. Sa faaaogaina lava le tusi faitau o le aso e tusa ma le faasinoga a le tusi faitau aso, Galuega 6: 8-15 i le manatu autu "Se tagata tumu i le alofa tunoa o le Atua." O le uiga lea na iloa ia Setefano ina ua iloa e i latou ona mata ua pei o se fofoga o se agelu (f.15). Fai mai le tama, o ai lea ua foliga i agelu, o le tiakono ua manumalo i le pine auro i le tautua. Sa faapea lava le soifua o lea auauna, aua sa fai lava ma malu o lana fanau o e oi le galuega.

O au lava foi na saunia le molimau i le soifua tautua o le tama

i le Ekalesia. Sa faamamafaina lava le vaai a le perofeta o Malaki i le galuega a le tunu auro e pei ona iai i le Malaki 3: 2-3, i le manatu autu "Faato'a iloa lava o ai oe i fua e aliali mai i lou ola." Aua foi o le tupu ae ua iloga lana tautua faatupu. O lana tuualalo faatama ma lana faaaloalo faa-tamalii i le afaigaluega faifeau e lagona ai le faatauavaa ae o atagia ai lona lotu maualalo, ma lana faaeaea i le Atua o le tupu. Na atagia lava foi lea i lona le manao lava e ufiufi nofoa o le malumalu e alala ai, e ui lava o tupu, ae agai i le Atua o ia o le tupu aoao, tatou te le o ma ni mamalu i luma o le Atua. O le tama sa malu ai le galuega, malu ai le afaigaluega, ae ua faia lava le finagalo o le Atua i le soifua ma le ola. E manatua pea ana galuega aua o iai pea moli teuteu e fa i le falesa o lana meaalofa i le malumalu ina ua 80 ona tausaga.

O au lava foi na taitai i sauniga i lona oliolisaga tumau. Sa tauaaoina ai le tagavai a le atunuu i le tina ia Serafina e manatua ai lana tautua i lona atunuu, ma matou faatofa atu ai i le pese faatofa a le au Kerisiano, a o mamalu pea lava le leoleoga a Tuisamau ma Ituala, aemaise Laauli ma le aumaga. Tofa tama, manuia lau malaga.

Pita Toleafoa FS
Laulii,

Tanivuti Lepaio

15 Tesema - 7 Aperila 2013

O le Susuga i le A'oa'o Fesoasoani o se lupe faalele o le Tala Lelei mai vasa. Sa ia tauave mai le lau olive a le LMS ma faavae ai le EFKS i Palmerston North. O ia o se meaalofa taua a le Atua i lenei Ekalesia i ona uiga tauagafau, lotu maualalo ma le agamalu.

O ia o se tautinoga vaaia ma se molimau lelei i lona soifua tautua faamaoni i le galuega a lesu Keriso lona Alii. E le'i faavaivai ona tofi ma tiute fai faaa'oa'o fesoasoani faamaoni tainane le tele o tofi sa ia tauave. O se auauna faatuatua ma faamoemoeina a

le Atua ae le lagona se leo. E loloto lona faatuatua, e tele foi lona onosai.

Ua sisi nei le la o lona sa, ua faatu foi le fana sauni e folau e feiloai fiafia ma lona Matai. Aua o lea ua mapu i fanua le faatamasoalii a le tautai matapalapala. A o le viiga ma le faamanu, ia foi atu pea ma ia tumau i le Atua Silisiliese e ona mea uma.

O lona sauniga faale-aiga sa faia lava i le malumalu EFKS i Palmerston North. O au sa taitai a o Pastor Fata Mailo sa faitau Tusi Paia. O Nevin Atoa FS sa lauga ae tatalo Elekana M. Tuialii FS.

O lona toe sauniga sa taitai le Susuga i le Toeaina Faatonu o Popo Sua. Sa faitauina le Tusi Paia e Elekana M. Tuialii FS, ae

lauga Nevin Atoa Kuki FS.

Sa molimau lona faletua o Sofai e sui i aiga ma fanau, o Leelaga Tuisafia TK ma loane Samia AF o sui o le Ekalesia. Ona faaiu lea i lona oliolisaga tumau i Kelvin Grove Cemetery.

Periti Fauolo FS
EFKS Palmerston North

Pasipasi Peti Palegae

O le Afioga i le alii tiakono matua o le Ekalesia EFKS i Palmerston North, Matagaluega Niu Sila i Saute.

O lona sauniga faale-aiga o au sa taitai, lauga Pava Tofaeono

faaauau itulau e sosoo ai


ATA O E UA MALILIU



Tanivuti Lepaio



Neemia Faatumua



Leniu Tofaeono



Pasipasi Peti

Pasipasi Peti

FS, EFKAS, tatalo Pastor Fata Mailo.

E le faigofie se upu molimau i le soifua auaua o lenei tama. O se tama tiakono ua iloga lona faiva faatiakono i lenei Ekalesia. O ia lava o se molimau soifua i le mana faaola o lona Matai, o le e ona le galuega. Sa galue fiafia ma faamaoni i le mea na gata ai lona malosi i le tino. O se tama uiga tausaaafia ma loto faatuatua aemaise le fiafia e tatalo.

O lona toe sauniga sa faia lava i le malumalu EFKS i Palmerston North, ma sa taitai ai le Susuga i le Toeaina Faatonu ia Popo Sua. Sa faitau Tusi paia Nevin Atoa FS, ae

lauga Elekana M. Tuialii FS, o au sa molimau.

Na faaiu ai i lona oliolisaga tumau i le fanua tanu i Kelvin Grove Cemetry.

“Le auaua lelei e ma le faamaoni, ulufale maia i le fiafia o lou Alii.”

Periti Fauolo FS,
EFKS Palmerston North


Leuapo Vai Apelu Tui

1 Aperila 1948 - 27 Iulai 2013

O Leuapo Apelu o se tasi o tiakono o lenei aulotu. Na amata mai lona soifua galue i le Ekalesia Metotisi, ma sa iai foi lona tofi o se failauga folafola o le Tala Lelei. Ae maluu nei o ia, oloo avea ma failautusi o le Ekalesia i Utualii nei. O le lua lenei o tausaga oloo ia tauaveina le tofi failautusi a lenei aulotu. Ua tusa ma le 9 tausaga o galue o se tiakono, ma iloa ai lona galue punoua'i ma faamaoni i ona tofi uma.

O se tama e le atoa lona malosi i le tino ona o ni gasegase ua aafia ai ona aao, ae taulamua i galuega ma mea e fai a le aulotu. Na maluu lava Leuapo a o taumafai atu le fanau e tili lona gasegase i le falemai i Leulumoega i le itula e 10am 27 Iulai 2013.

O ona toe sauniga na faia lava i le malumalu EFKS i Utualii i le



Leuapo Vai Apelu Tui

10.30am i le Aso Tofi, 8 Aokuso 2013. O au na taitai ma momoli atu i totonu lona sa, o le Susuga Pala Tolai, faifeau Metotisi i Tufulelei, na ia saunia tatalo, ae faitauina Tusi Paia e le Fesoasoani i Tufulele, o Siaifoi Kelekolio. Na molimau le tina ia Maafaavae, ma Mauga Tui ma Faiilagi Seulua Tariu e fai ma sui o le fanau, faapea foi nisi o lona aiga mai Manono.

O se tiakono e agamalu ma loto maulalo, e talanoa tausua foi i ona uso matai ma soo se tasi. E manatua pea o ia i taimi o faatasiga a le aulotu - auu e muamua lava taunuu i soo se galuega fai.

“.....ua tumu foi le fale i le manogi o le uu.” O ia o se uu manogi ua tumu ai le galuega a le Atua i lenei aulotu. Ia sasala pea lenei u'u i le tina ma le fanau ua tuua, aemaise ai o tagata lotu e latou te manatua lenei tama ma ana galuega. Ia maua sona mapusaga i le maota o le Tama i le lagi. Ia manuia lau malaga.

Faraimo Tiitii FS,
EFKS - Utualii.